

Aitodianareta Akany Nuidetele Nuka Ekanisa Lokabeit Loka Edeke Lokajaran

Jeffersonville, Indiana, U.S.A.
60-0911E

1 Eyalama, Onac Neville, kisirereng Ejakait ijo. Erai cut kaitebeikin arereng ajaut ne atibong na. Eyalama eong noi ebe abu Ejakait ocamak oni aswam ngun. Akuriana eong akameran mot. Akoto...Kolot ngaren, olema kes. Ido edolit ngin. Ejok do. Kwana, emwanamwanat do ber bobo. Kijaar oni Aisirareta aarei nuepolok kama ejai Ejakait, atibong na, asesenete ebe...

2 Ejaas ikapapero ne luebeit aiteker imotokan aojau, ice kotoma kakesi ageun kokwap cut kangina ko Kentucky. Koany Onac Welch Evans ka ekekal anyoun ko Tifton, Georgia. Eriamuna eong kede itunga kokinga luenyounitos ko California. Ejaas ice ne lueponitos ko Germany ka aiboisio nuegelegela abunore nejai iboisit yenididi yen, aijaanakin Ejakait. Ido aseseni eong Inac Cox. Acamunit eong totoke okilenike ka kesi kere ejaas ne. Luepote aticepak abongor amairon nuipu akaur na Kentucky, Gerogia, kwap kiton Tennessee, kuju kiton Ohio, ikapero lu. Epapero ediopet lo, Onac Ted Dudley, loebunit anyoun ko Phoenix, Arizona. Ejaas kesi luipu ne, ice, korai eong apedori aiworo ikecekiroria, ebunore ne aipejokin isio lolo. Akaisakanykaongon kotoma akwatat kakesi mam ber eong adolokinit karaida atiror akecekanin. Aseseni eong ikapapero luieponitos ko Chicago, ka airimun kere. Imwasi bo ai itunga kotoma kane lueponitos kokinga naka ebooma, ikeutu akaninikus. Akaisakanykaongon kotoma akwatat luka esipan, kwana, elomunitos kotoma oeparo luegelegela kokanisan luegelegela airomor akwapuwok.

3 Ido alimonokit eong adaun apak naeaja atupuruc na, ailipanakin lukadekak kiton isawan iuni kede atutubet, aso abu eong aororik mot. Ido ebeit eong alimonokin ipak edit kanu asubet bala alomar toma, loinyarit oni ebe egia lokiareit, eroko.

Onac Lee Vayle je ngina, amameete bobo eong ace adepar atiror akekanin, ediopet kotoma ocokok luka aupaka; okanisa loko Baptist, Ohio.

Ijo ngopengol, Ben? [Olimuni Onac Ben Bryant ebe, "Amen."-Ekewa.] Mam eong eirarit ijo ilimuni ebe "amen" ber, arai ti eong ajenunit ijo. Kere ejenete Onac Ben. Ido ajeni eong ebe elomunit ngesi kokinga naka ebooma, aso mam eong ajeni...nekibunitor ijo kwapekwana, Onac Ben? ["Eebo, ijai isio laiye agolitomei nako Borden, Indiana, onac."] Borden, Indiana.

4 Iyalama isio noi ajaut ka ngininganan ne. Ido kwana mam eong alosi aisiyap yesi adaun aojau, kanuka amairon nuelwaka nuebeit yesi aiteker. Korai eong apedori ayangar kanginidiopet kayesi kede eong ore akuar na. Apeleikinit kereka eong ngin cut. Ebeit anyoun bala isawan ikanyaongon, kiding osawan ikanyaongon ka itomon luka atupuruc, ido korai-korai eong apedori angetakin aitorio yesi toma. Aseseni eong opaperoka kane loebunit ko Arkansas, akeberu. Mam erai ijo nges etunganan loapotu isio... loabu Edeke kinerakinotor kosodi alimokin iboro lu kane akuar ya? Aomit eong ebe nges ijo. Kwape kangolonglio eong, ianyuni ijo ipapero lutetiak ka lumojong. Aso ejeni Edeke alosikineta nuka Ekatau, ebe epuda ti eong adolun aanyun ijo, kasodi aangar ijo ore kede eong kasodete ajaun kede aimor najokan. Konye adiopepaaran ibuni oni aswam ngun, nemam bobo oni ibunio atemar ebe, "Ekoto oni aisunyakini. Ebeit alosit alemun idwe. Edeka icetunganan." Ngun do kere epote adaun, apaaran ngin napolon. Emuno eong ebe eyatakisi ber airiamunun irwanpu.

5 Kwana, erai akalosikinete, kwape kedareunitor kama ejai Ejakait kwana, ajenun ekawai lotenara. Kwana, apaaran naiareit, abuni eong aipudakin ailipasia adepar kwa lem epudar eong kotoma ajaraka kere. Abuni eong ailip ijo korai ijo opedori ailipanakin eong. [Kotemar atukos ebe, "Amen."-Ekewa.] A-Abuni eong aipudakin akonilipasia. Okapanakin cut ailipanakin eong. Eipone loibelokinor ekwam kanaiareit, ebuni aticepak araut ibore yenepol noi neka, ka nejai Ekanisa ka kanuka Kristo. Aso okapakin ailipanakin eong.

6 Kwana, do, kiton neajenuna eong ewai loebait aitenar ka nuebeit aswam, edarekinit eong Ejakait. Kotoma apak kangin, abuni eong aapu kokanisa kane, toma ka kinga, alimonokini, elipanakini luadekak, eswamai idiobore yenapedori eong aswam. Ikoto oni, adiopepaaran, arai mam apugan itikokini oni, ikoto oni adukokin ekanisa ne ekanisa loibus loipedoria oni ajaun kede aiboisit naiboikina, agoola napolon, ka ebalasa, kaceda, aso ebuni araun abeit cut ekanisa loibus, ojaas acuuman nuekusetekwam loelilim, tetere itunga iboikinos inapakina, aipup aijaanakin, arai ecamakisi oni aswama ngun. Imuno oni kwangin. Kwana ilipanakinai isio.

7 Ido kwana, atibong na, ilosi oni adolokin akou naka akirot nabu eong esumunik, atupuruc na, arai itojok Ejakait, einer nuke, atibong na. Ido ebuni araun, nepetai, aisisianakin, kanuka eporoto. Akoto eong einer, atibong na, nuikamunitos: Aitodianareta Akany Nuidetele Nuka Ekanisa Lokabeit Loka Edeke Lokajaran. Aitogogongeta akany nuka Ekanisa lokabeit, arai atemasi, aitodianareta akany nuka Ekanisa lokabeit!

8 Kwana, eroko oni edolokina akirot na napolon nakapedor, alosi eong aingit ijo akirot naka ailip. Alosi eong ailip ecokoniwok, Onac Neville, arai epedori ngesi abunore lailo ainakin ailip kanuka Akirot naka

Edeke. Kwape kipukorio, oni kere, Matayo eijiri, esula lo 16, ekokoro lo 18, ageuna ber, Matayo eijiri 16:18, kwape kejaar Onac Neville abunore kanuka ainakin ailip naka aisinapikin.

[Ilipi Onac Orman Neville kwanata-Ekewa.]

["Papakosi Lokuju, iyalama isio noi atibong na kanuka, arereng ka ajokis ace nakeinakinitai isio kotoma aitimikon napolon, namam edaun. Iyalama isio noi atibong na kanuka aibwosunet ka airiunet, ka aingarenikinio naka Emoyo Lokalaunan. Isiyalamikinit isio, Ekosideke, irai Ijo Edeke ngol loabu odok kosodi ajaun tomakosi ka ajaun kede isio, kiton awasia naka akwap kana."] Eebo.

[Papa, atiokisio nuapolok ka aitemisio nuka moi mam eraunos ibore anyoun nekisalakinitor isio itingit akonikan kasodete alosit nepepe ka Ijo."] Abeit cut, Ejakait. ["Ilipi isio, Ejakait, ebe ti Ijo iinak aitim naejai kotoma adules, idiopet ka yenice, ajenete ebe nejaar idiopet toma aitemio naidul, ka aigimorio naeninik kakere, ebe isio, da, adiopet kotoma apaarasia kanu, ibuni aitor toma ojautenesio kwape kangul. Edeke, koinakinai isio Emoyo loka Yesu tomakosi, kiton nekipupia isio kanuka idiopet ka yenice, noi cut, kiton nejaunor amorikikina akidingos kosi, kiton nekipedoria isio aijaanakin Ijo, nepepe."] Eebo.

["Papa, isiyalamikinit isio Ijo, atibong na, kanukanu, ace, arereng na ainakin isio, apedor aboi kokwap naka aisisianakin naka Ekonijaanakinan loinyonyoikinit Ijo, loiseikinit Ijo adoketait na."] Eyalama. ["Loabu Ijo koany ibecokina acamakin isio ajaun kede arereng naka ajaut toma, kokwap naka arerengusio nuka aijaanakin kana. Kisirereng nges ka isio, kere, kede...kede aijaanakin na naejaatatar ngesi tomake."] Koinakinai ngin. Eebo.

[Papa, ilipi isio ebe kwape ejaatatar apaarasia nu aapun kosabiiti loebunit, neibunio isio aiworo mamaKon kwana kotoma koipone kalo aingainga, eneranakinis otauonokosi, ebe, 'Edeke, anyoun apak nailimokina Ijo isio ebe idiobore kere yenilimuni isio, iswamaun kwape kibalar isio, arai bon ipedori isio aiyuun kasodete amunokin kasodete arimar Ijo.' Kanukangun, Ejakait, apaarasia nu nuejaas angetakin nuebeit araut aigimorio mama ejai onaceka, ka onacekosi, ka Ekonibulesit. Wu Edeke, ititingikini isio nges Mamakon, kabaarara, kokiror loka Ejakait Yesu, elipi eong ebe orapia ijo nges kede ayuara nakotoma Akuj ido ayuara namam nges ejenunitor lem."] Koinakinai ngin, Ejakait. Iswama ngun Ejakait.

Ekadeke, ilipi isio ebe itonokoki Ijo kanginipedor nakaijen naebuni adakun, aitam aitapaar arai aibelokin awai."] Koinakinai ngin, Ejakait. [Opuko akekituk kede akirot naka acoa naejaar arereng naka einer"] Eebo, Ejakait. ["Wu Ejakait, isiyalakinit isio Ijo, Ekosideke, ebe iswamau Ijo ewai kanuka Ikonobulesi kere, anatar aturio."] Eebo. ["Ido araun Emoyo Lokalaunan loilosikina kanu ainakin akiro nunera tetere epedori aibwo kakonyen nuka itunga kalu isisiatos ido ocobe."] Eebo, Ejakait.

["Ilipit isio Ijo, Papakosi, ainakin isio alosit ka aiyapaara ido ka aiyamakina, ido Akonyenekon, Wu Ejakait Yesu. Koinakinai isio eswamata Akonikot kasodete aipup Ajakutukon bon. Ojaun kede isio kwana. Kosodi, Wu Edeke, ilipi isio ebe isitokoori ijo aima kotomakosi, kiton nelomuna, mere kede agogong, konye ebuni aima alomun kane ijai isio, kede ainyonyoikinio."] Wu Edeke!

[Oo, Ekajakait, atibong na, ongetak apaaran na nakaumokin naibunio Ijo kosodi kitangal da lukadekak, ilaku da lu luaolioritos, ido ijaun kede isio, aitalaun itauon kalu mam elaete."] Eebo!..?... ["Kwana, Ejakait, ikama Ijo atibong na, kotoma aijaanakin kana, ido isirereng eporoto loka onacekosi. Ido isirereng Akirot kwape eleleunia. Ajaunos isio kede itauon ka aomisio nu ijaunete. Ido, Edeke, kwana ocam akosima kanukangin, Kokiror loka Yesu. Amen ido Amen."] Amen.

Biai abore ngin ejaatatar evolium loilosikina? Egwetakina kere? Kere egwetakina? [Kotemari icetunganan ebe, "Egwetakina kere."-Ekewa.] Na erai amaik, amaik naejok? ["Aarei kere."] Ipupepete yesi eong ejok? Kau cut kau, yesi ipupepete eong? ["Amen."] Eebo. Ejok.

9 Akoto eong asiomun kwana kotoma Oitaabo loka Matayo, esula lo 16 ka ekokoro lo 18. Abuni eong ageun kede ekokoro lo 17.

Kobongok Yesu kotema nges atiar kisirerengitai ijo, Simon okoku loka Yona! Naarai mam akuan ka aokot kipukokinito jo ngun, dimarai Papaka loejai toma akuj.

...Eong da...alimokini ijo ebe irai ijo Petero, adukokini Ekakanisa toma atiida na, ikirigin da luka okatwak mam ipikorete.

Kisirereng Edeke Akekirot.

10 Akirot ebe Ekanisa, kotoma kanginidiopet kotoma akirot na aseku eong atibong na, aitam ainerakin yes, adiopet kotoma kakesi nges: Inyobo Ekanisa? Ingaibo asipokini? Inyobo Akeisiraret? Koipone bo ali ipedoria oni araun idiopet kotomake? Ido oni ipedori alosit Kuju komam iraunia ediopet kotomake?

Kwana, kanginidiopet kotoma akiro kangun epedori ayangaikin isawan, aingici kau ka ngaren. Konye akoto eong bon atiror aboisio adis nuegogong, kanu aitoduun nuerai Ekanisa lokabeit. Ido, kwana, akoto eong ijo ajaut kede Ikusibaibulin.

11 Kwana, aiboisit nasodit, akirot ebe Ekanisa, alopet, erai akepolou, "Luenyaraunitai kinga."

Kwana, mam Isirael arai ekanisa loka Edeke anyoun neajaatatar kesi Misiri. Araas kesi itunga luka Edeke. Kosodi do neanyaraunia Edeke kes kinga nako Misiri, koraunos ekanisa loka Edeke, naarai apotu korautu luenyaraunitai kinga."

Kwana, esalit ngin ikoni nepenen lolo. Akirot Ekanisa akepolou ebe "Luenyaraunitai kinga," ngul luanyaraun kinga, atiakun, etegelikin.

12 Kwana, kotoma Atutuket Nakitetet, Ekanisa loejena anyaritai "Akabakanut naka Edeke," Akabakanut naka Edeke. Kwana, aleminit eong na kotoma akiro nuka Obaibuli. Aitutuket Namojong, anyaritai Ekanisa "Akabakanut naka Edeke." Kotoma akiro ace, erai Edeke Ekabaka, ido Ekanisa nges Akekabakanut. "Akabakanut naka Edeke," Atutuket Namojong.

Kotoma Atutuket Nakitetet, enyaritai "Apugan naka Mesia," Oo, amina eong ngin, naka Mesia. Kotoma acekiro, "Apugan naka Mesia," neyait Mesia ka aipuga. Emameete agalisio nuka idiinin arai idiobore, ipugai Mesia kotoma Akabakanutuke. Ngin mam erai aomoom naeumokina? Akabakanut naka Mesia. Kanukangun, mam Ekanisa erai erionget, mam Ekanisa erai atukot naka itunga. Ekanisa erai itunga luka Edeke luenyaraunitai kokinga naka akwapin, kanu aijaanakin kotoma Akabakanut ace.

13 Ebuni na asalakin erai na iitunitai. Ilapio idis kau, alosi eong kede aberu osokooni. Ido apotu isio adumutu ibore yenetegelikina, ajai aberu korot, na anapit esikaat. Eninik, mam ijo ipedori acamun, konye abeit apotu isio adumutu adiopet. Kosodi aberu atemar eong ebe, "Ijo ba , osesen ber ijo ngun."

Eong ebe, "Ekoto nges korai Akristayot. Itegelikina ngesi noi." Erai nuka ileic.

Kosodi aingiset alomun, "Kanukinyo, Bill, ebe oni, kwape Ikristayon, ido Aiyuun na nakijai oni toma, kanukinyo eraar ebe itingaikinit oni awokongor ainap igoen, luikote nen? Itunga lu okanisan ice mam iswamaete kwangin? Enapete ikecegoen kwangin, igoen luarokok, ido kanukinyo? Mam jo ilimunitor ebe enapete kesi erono."

Katemari eong ebe, "arai ngin abeit. Mam eong apedori atubokin idio tunganan. Konye, asesen kes, 'ijenuni kes kotoma araitokec.' Aticepak mam kes egwaunito akiro da, konye tomakec ejai emoyo loitolosi kesi aswam nuarokok."

14 Kwana, abala Yesu ebe, "nginitunganan yen eanyuni aberu kosodi amielakin nges, adau aisidotiar nges kotauke." Kwana, ne ebongonokina adiaakanaran ngon kanu aswam adoteu, ingaibo edumuni ediakarit? Aberu na obu itodia ekeijaar koipone kangol. Aticepak ipedori jo olai bala ekoromit, kakiro nuikamunito ajokis. Konye arai kijaik jo akonikuan koipone loainap erono koingaren naka itunga, karaida mam jo iswamat adiakar, abu jo idupo etunganan aomoom erono nekon, korai jo idiakarit. Abala Yesu ebe, ikamunete jo akiro nu "aswam adoteu." Ido, "naadote mam elomari Kuju nepecepeda."

15 konye, kwape alosia eong airimor akwap kere, adumuni eong ebe, kangolikwap ejaatatar kede ekemoyo. Ido akwapin kere ajokit nges eyait. Apuganasia kere erai ajokit nges nges ipugat. Ebala Ebaibuli kwaen. Eretosi, ejiosi ido epote ainyikokin kiton nebonguna Yesu, kosodi esipokinido Ngesi ajakanut naemamei ejie. Konye abu Satan ikenyak yesu ebe, ajakanuto nuka akwap kere eraas nukeng, ido apedori ngesi aitaswam kes koipone loekotor. Ido kere eraas iboro luitaswamai ngesi, ajakanuto nuka Satan. Abu Satan kolimok Yesu ebe, "Kainakini ijo kere arai bon kibirokin kwap aima eong."

Ajeni Yesu ebe abuni Ngesi airumun kes, kotoma apugan naka ikar elukumit, kanuka ngun kotemari, "Orwa kamaka, Satan." Ajeni ngesi ebe ebuni Edeke ainakin Nges akabakanuto kere nukakwap, ido eraunos nukeng, ido epote kere araun akabakanut adiopet.

16 Kilot jo akwap naka Agirimani, idumuni jo emoyo loka Ogirimani, kilot jo Bulaya, idumuni jo emoyo loka Obulaya, kilot jo Sweden, idumuni jo emoyo loka Sweden. Kilot jo France, idumuni jo emoyo loka France. Kibu jo Amerika, idumuni jo emoyo loka Amerika.

Abu eong abwou ko San Angelo, ko Roma, sek kokau kangina, ido akoto ngo aanyun aipany naedaanakinio luatwak ko Rome. Ido nukaumokin, ido kotoma aitoronio, kwape etunganan loka Amerika, abwoi koingaren naka erute loelomarere toma aipany naedanakinio itunga koRome, kotemarete ebe, "Nejaas angor nuka Amerika: konapakisi ikusigoen ido koyongikisi lukatwak eroko ilomuna ne." Neijesaror akwap adoketait ngin, erono adepar, neidolio adoketait ngin. Aso itei do jo, naarai...

Abu eong adiopepak engit aceberu ebe, Ijo irai Akristayot?"

17 Ebala ebe, "Arai eong naka America. Arai cabo eong." Mam ngun ikamanara kede ngin.

Abu Onac Bosworth ingit aberu adiopet, akuar adiopet, ebe, "Inac, ijo irai Akristayot?"

Ebala ebe, "Abuni atimisiikin ijo, enoki eong akandol nginikuar." Osubite do bala ejai toma kangun ibore

yenikamanara kede Ekristayone, ainok ekandol. Emameet Ekristayone kede iboro kwa ngul. Ido Ekanisa loka Edeke emameete kede iboro kwape kangul.

18 Kwana, inyobo einakinit aberu...Mam oni ibuiakinit angor ngun aswam ngun. Mam oni ibuiakinit ikiliokowok mam aimat ajon, mam aiyapo. Ilimonokini oni eijiri bon, kasodete apesikin eipone loka Ebaibuli. Ikiliok luipu luepote toma aiyuun naka Opentekosit ka aiyuun naka alaunit, epote toma kosodete alimor ebe eraas kesi, komam eraas, kotoma otuonokec. Angor nuipu da iswamaete ibore ngipengin. Mam isio ilimonikini kes ebe ebeit kes aswam ngun. Kiinakini isio kes eipone loejaaar bon. Alimonokin kes nuebala Ebaibuli, ido arai euritai kes kede Emoyo loka Akuj, mam do bobo ekecemoyo erai loka America, mam bobo erai loka Germany. Itaraunio loka Akuj, nejai, Akabakanut naka Edeke, nejai enape loibus, alaunit ka apedor.

19 Kijaar oni kede erot loengaara mama ejai Ekabakawok. Inerakin oni kede Nges ediosawa kere loikotor oni aiworo Nges. Emamei oni loinganakini, emamei ekapuron ece kiding Ekabaka kede oni, konye Etunganan ngol ediopet, Kristo Yesu. Aso ijari oni kotoma Akabakanut. Ido enyaritai, kotoma akiro nuka Obaibuli ebe, "Akabakanut naka Mesia, Mesia." Kotoma akiro ace, neyait Mesia kotoma kanginijar kere kotoma Apuganike, aipuga ajar naka Iketunga, itunga luenyaraunitai kinga kotoma kanginidoketait kere naka ajar, atukonokin kes nepepe toma aibunget, ido enyarit Ngesi ngol ebe, "Ekekanisa," arai "Luke luenyaraunitai." Ngin mam erai ibore yenibus? [Kotemari atukos ebe, "Amen."-Ekewa.]

20 Kwana, arai Isirael itunga loka Edeke kiton (idumuni oni kotoma Aswamisio nuka Ikiyakia 7:38, arai ijai ijo aiwadik) kosodete do anyara kes ekanisa loka Edeke, naarai anyaraunit Edeke kes, kinga nako Misiri, kinga naka akwapin, kinga awai naka ikanisan, kinga awai naka idiinin, alosit kede Edeke bon.

Ido, kwana, Ekanisa da loka Edeke lolo kwapekwanin, enyaraunitai kinga kotoma kanginibore yenakwap, enyaraunitai kinga kotoma kanginibunget naka ediini, enyaraunitai kinga kotoma kanginidiini, enyaraunitai kanga kotoma kanginirionget loka ediini, aupakin kede Edeke. Mere araut luipugat Ekaanyanaran, konye luipugat Kristo, kotoma Akabakanut kana naka Mesia najari oni kotoma. Kristo nges Ekabaka. Erai Kristo.

21 Kwana, Kristo nges erai Akou naka kalo. Kristo nges Akou naka Akabakanut naka Mesia. Ido mam ijo ipedori aitarauun Akabakanut naingarenikinit Kristo erionget. Mam ijo ipedori aitarauun Akabakanut naingarenikinit Kristo ediini. Naarai, erai Kristo Ekabaka, ido mam ijo ipedori alemun aomisio nuka etunganan kosodi aiswamaun erionget loebuni Kristo aipuga. Kanukangun, adiotukot, idiotunga, adiobunget naka itunga, luetamete aitarauun Akabakanut naka Edeke erionget, ijai ijo aitepeg Ekabaka. Arai itepegete kesi Ekabaka, esurokinit bodo ngin Ekabaka. Aso arai esurokinit ngin Ekabaka, ebuni do araut lokasurup loka Kristo. Egwayam ngin mot. Korai ti eong ajaatatar eporoto loiyatakina, ti oni itacau ngin ejok cut. Erai lokasurup loka Kristo. Arai ibuni ijo atitingikin eong apak edit, etogogongoori eong ngun. Etami Emoyo lokasurup loka Kristo alemun itunga-itunga kosodi anyaraun kes anyoun orionget kito orionget, atukokin kes nepepe, namam arai akote naka Edeke. Asurunokisi duc eong itunga naarai aseni eong ka agogong iriongeta. Mam erai itunga luejaas toma nen, luajai eong aisen. Erai Emoyo ngol loiriamit loenakinit itunga aomoom ngun, "Irai oni itunga."

22 Itunga loka Edeke kes Iketunga luenyaraunitai kinga. Eyuunit eong ebe ejaas toma kanginidiini kere. Epedorete koraas Itulikini. Epedoret koraas igereesan. Epedorete koraas Iyudayan. Epedoret koraas ediopone kere loka ekanisa. Konye Ekanisa obe nges akuan naka aiyeyea naka Kristo.

Kwana, mam ijo ipedori aitarauun akuan naka aiyeyea naka Kristo erionget. Kwana, kanginitunganan yenebuni nejai kristo, elomunit kotoma akwapin, olomuni toma Kristo, olomuni toma AkuanaKe naka aiyeyea. Ido iraun do ijo ediopet kotoma Akuan nekitolomunere ijo Okanisa lo, anyaraun kinga kosodete aibatisaikin toma Akuan naka aiyeyea. Imisiik ijo ngin? Mere Methodist, mere Baptist, Mere Pentekosit, mere Nazarene, Mere Pilgrim Holiness, mere Atulik; konye Akuan naka Yesu Kristo. Ibuni oni ayatakin aitetem ngin kaidules kotoma aingiseta ace, kotoma odakikan idis, kwape kilosio oni aiboisioke nuidulok. Konye, Akuan naka Kristo nges Ekanisa.

23 kwana, abu ngesi kituput ngin kotoma awaragasia nuipu, kwape kotoma okiliokit ka aberu. Enyarit Ngesi Ekanisa, "Ateran." Ido mam bobo ateran ka Eteran eroko eraas, itunga iarei; eraas idiopet. "Erai Ngesi akiring naka AkekiringKe ido akoit naka Akekojo." Ido nakenyaraunere ekiliokit arai aberu toma Akuan naka aiyeyea naka Kristo, ka Emoyo Lokalaunan, eraunete kailleleba idiopet kotoma Akuan kana nekilelebunotor kesi kede Emoyo Lokalaunan. Naarai, abu Edeke kolek Emoyo loka Kristo, kitajarau Akekuan kosodi aisiboikin OicolongoKe, kosodi ainyakun Emoyo Lokalaunan aiswamaun Akuan naka aiyeyea naka Kristo, naebuni aimorokikin kotoma Opucit loka Edukone kotoma Abongun naka Ejakait. Mam ijo ipedori aitarauun ngol erionget. Erai aiyeyea.

24 Kotema Yesu Nikodemu atiar, ekusi ekwam mama ekot. Mam ijo ipedori ajenun kama kebungio, karaida mama ebei. Kwangin ejaar nginitunganan yeneurita ka Emoyo." Mam ijo ipedori amisiikin. Ebuni kamace. Ido mam erai Methodist. Mam erai Baptist. Mam erai Pentekosit. Mam erai ediorionget. Erai aurio, auruunio toma Akabakanut naka Edeke.

Kwana, aitam ataraun ngol erionget, itarauni do ngin araut lokasurup loka Kristo, naarai idiobore yenesurokinit aisisianakin naka Kristo erai lokasurup loka Kristo.

25 Kwana, aibo do agearor erionget lo? Neajaar Yesu toma akwap, mam abu kosub ediokanisa erionget. Amamei ekanisa loarai erionget, adaun ikar luipu akaulo naka atwanare naka ekiyaka lokawasia. Ido ekanisa losodit loabu oraun erionget kotoma akwap arai Ekanisa loka Atulik loka Iyomayon. Kwana, ajatar eong kede itaabon luenyaritai Pre-Nicene Fathers, Fox Book of Martyrs, aiwadikaeta nuka Josephus, kosodi loka Pemberman loenyaritai Early Ages, ka ikewadikak ice luipu lukolosek. Ido emamei, emamei kanenice kere neiwadikaterere kotaabo idio kere loka akiro nukolosek, neajaar ekanisa loarai erionget, kiton netaraunere ekanisa loka Iromayon loka Atulik erionget. Ido abu koraun erionget, loetepegit Edeke.

Kwana, arai ebunit ibore kwanat kangin...Oo, orai ti eong apedori aisimisiikin ijo ngun. Arai ebunit ibore kwanat kangin ido kobeite eraun lokasurup loka Kristo loapolon, mam kereka ti Edeke elingaki ajenun ngin, arai erai Ngesi Edeke loemamei esange? [Kotemari atukos ebe, "Amen."-Ekewa.] Arai erai Ngesi loemamei esange, mam ti Nges ejenu ebe aponitos iboro lu? Ido arai erai ngin ibore yenaronon noi adoketait kangin, mam kereka ti Nges ikwenya Ekekanisa eroko apak? ["Amen."] Kwana, amuno eong ebe imisiik ijo ejok, ibore yen einakinit eong asurokinit, mere itunga lu oriongeta, konye iriongeta ikulepek koma apaarkec. Mam epedori araut idiobore kere dimarai lokasurup loka Kristo, kotoma kanginidiopet kakesi.

26 Kwana ibala ijo ebe, "Idareik ipak edit, aomit eong ebe mam ijo ilimonokinit idiobore dimarai Ebailbuli."

Aso bodo acamakisi Ebaibuli kolim. Apukosi ipak kasodete aisiom. Apukosi nepepe Apukokinio, esula lo 17. Erai na apukokinio naka Yesu Kristo, mama ejai Ekanisa, Ekanisa loenyaraunitai kinga. Apukokinio 17. Ido ibuni aitam aisunyakini na katipet noi. Konye kwana, kotoik ejok kwape kisiomia.

...kosodi kobu ediopet kotoma Komalaikan ikanykaarei lujaas atanyia akanykaarei, kinerata keong ebe... "Bia ketodikini ijo atubokinio naka naadote napolon naiboie kakipi nuipu:

Kwana, nu kere iwadikatai kitwasamaete awaragasia, naarai erai Apukokinio naka Yesu Kristo, kipucakinitai. Ijo ijeni lem ngun? Erai ibore yenibwaa, ido epedorio bon apukor, mere kotoma acoa naka Adam, konye epukorio kede Emoyo Lokalaunan kotoma ainakineta nuka Emoyo. "Yenejai acoa, imar amwaus naka etiang. Yenejai acoa, ainakineta naka acoa, kismama na ido kismama ya." Ido Na nges apukokinio.

27 Kwana, idiotunganan kere ejeni ebe, neelimunere aberu Kobaibuli, epeleikinit ekanisa. Ekanisa loka Kristo enyaritai "Ateran." Abala Paul ebe, "esinerikini yes Kristo kwape abekot naelai."

kwana kane inera oni nuikamunitos aberu napolon, naerai naadote. Abala Emalaika elimokini Yokana ebe, "Biai, ketodikini jo," "Atubokinio naka naadote nakapolon, naiboie kakipi nuipu." Kwana, "aburu iboie akipi," eruo bala aiyeeya noi, konye ejai kere ne. Itetemunit Ebaibuli.

Kwana apukosi esula lo 15, tetere ipedori...arai katemasi ikokoron 15, kosula kangopekangol, tetere ijo ipedori aanyun a-a-a-a-apolou naka "akipi."

Kabala Ngesi eong ebe, Akipi nuibu koany, kama iboio naadote, kes kitunga,...ka ikodeta, ...ka atekerin ka angejepa.

28 Kanuka kangun, akipu nu eboia aberu, kokuju, epugat "atekerin, itunga, ikodeta, ka angejepa." Abu kipugate ngun kere; aberu, aberu naadote.

Kwana, arai erai eberu naadote, arai ijeni oni ebe enyaritai aberu kwangin kotoma akuan, kanejai a-aburu, ijenuni oni ebe mam nges arai namunot nejai okilenike. Kwangin tikenyaraere nges. Aso edumuni do ngesi ejai aisoswaikinit ajar kwape namunot mama ejai ekiliokit, ido komam erai namunot mamake. Ngin edolit? [Kotemari atukos ebe, "Amen."-Ekewa.]

Aso, do, lo nges ekanisa loebala ebe Kristo nges Okilenike, ido itepegite akeisisianakin Aisisianakin naka Kristo. Erai ngesi amalayat. Ido ipugat itunga ka ikodeta ka atekerin. "Kwana kiany oni aput.

29 *...naadoteata ikabakan luka akwap, ka ngul da luiboiete kotoma akwap...amerikinos ebino loka adoteuka.*

Inyobo adoteu? "Amamus aila; araut yenimam ilai." Erai ngesi amalayat. Ejaas kede amamus alaunit nekeng, ido ikabarak kere luka akwap, ikabakan ka lukapolok luka atekerin ka ikodeta, adoteata kanges, amorata akediakar. Itei jo nejai adolokin, ijo mam itei? [Kotemari atukos ebe, "Amen."-Ekewa]

30 Kwana, mam eong ikamunitos akiro kanu aiwadik na, konye ikamunete eong akiro arai mam eong esisianakini ngin. Ahaa. Inera kwana do oni nuikamunitos ekanisa. Kwana, arai kimisiik ijo, kwape ikunyakina ngaren mot.

Aso abu kadaka eong amoding kotoma Omoy; kaany da aberu iboie kotiang...

Eong ber alem ijenuneta lu kwape kilosio ngaren. Kwana, naireremat nges "Narengan." Narengan, koipone ediopet, erai eriagi loejok. Nereng, kotoma oipone ece, erai eriagi loaronon, aica narengan, eriagi loationis," Ereremat eriagi...Esirit anapito narengan," narengan, amalayat.

"Ido kiboie kokuju naka etiang." Etiang, kotoma Obaibuli, akepolou "apedor." Arai imisiik ijo, ijaanakinak luipu, aseseni eong kes ijangete akecekwes, edolit, naarai eraas kesi ikesisianakinak luka Ebaibuli. Etiang akepolou "apedor." Kiseseni oni etiang lo loka-loka Obaibuli, loka Apukokinio 13, ka Daniel, elomuni akipi; itiang, apedorosio, elomunute kotunga.

31 Konye ijo obu komisiik? Kotoma Apukokinio 13, neatakanunia United States, nges bon etiang kotoma Obaibuli, loabu kotakanu, lomam alomunit kakipi. Ebalala Ebaibuli ebe, abu kolom kakwap, neamameete itunga. Ngini nges arai apugan nakitetet. Ido kosubite bala Imerekek, konye akaulo apak edit, abu kiner bala apiu. Nges akwap na. Ejai aismamaun. Adiopepaaran, epote aismamaun aibucaret kosodete asekun ekesa loaronon. Itonyounete Yosep, arai...Eparao lomam ejeni Yosep." Apotu kotamata ngini sek, ido epote aitam bobo, arai ekurwoki kes ilolo kana. Edoluni do. Ebalala Ebaibuli kwangin. Kwana, mam eong arai epugan. Iwaitin ngul iarei kere angwalitos. Ajai eong acakakin akaseetait nejai Yesu Kristo. Ngesi bon apodokinit eong. Konye, alimokini eong ijo, ekoto ijo aiputar akonigalibitin kwana, imuno ijo adiolajaara kanuka ikonidwe. Mam eong ajeni kwa eyapiar. Ilip. Eebo. Kojaas...okwenyi.

32 *Aso abu kadaka eong amoding kotoma Omoyo; kaany da aberu (ekanisa) iboie kotiang loereng, loileleba ikiroria lukainyanakin, ojaas akwes akanykaarei, ka amumwara da atomon.*

"Akwes akanykaarei." Kokwap kane, abala ebe "Akwes akanykaarei," nuajaas otiang, "Kes irongan ikanykaarei lu-luiboie ere kotoma." Kwana alibo ere loidukonitai orongan ikanykaarei? [Kotemari atukos ebe, "Rome." -Ekewa.] Rome, cut bec, ere loiboie korongan ikanykaarei; ekanisa, aberu, amalayat naebuni aipuga akwap kede akepedorosio. Kanukinyo, idelelei cut kwape aisiom apapula naiyemuto. Itei jo? Abeit cut.

33 Kwana.

Konapite aberu anapito namuge ka nakarengan, (aberi, ekanisa, ebarit), kisiriitete esabu ka amor nuka akais nuipu,...

Kolimokinai eong neabu idio kakesi kotacia esolo loikapun kalu edumununei ngesi. Kolimokinai eong neapotu itatacatar idiobore. Apedor, nakanginibore kere yenekotosi kesi aswam. Ejaatatar Edeke idwe toma kangina. Abeit cut ejaatatar.

Eputosi kere, mam amot epedori anyara ebinika ebe iriono. Irwanapu ebalas igereesan ebe, "Eebo apotu Itulikin koarata na, ya, nace ya." Ingai aari Joseph Smith? Mam eong acamanara kede nges. Konye ajaas ngesi kede apedor kanuka aijaanakinike kwape kajaatatar eong da kanuka kanaka, kane kotoma Amerika. Kosodi Ekanisa loka Methodist aiyar Joseph Smith. Idolo ijo toma-toma Salt Lake City, ejaas kede aiwadikaet napolon naati ebe, "Yesi Methodists, kocoitos ebeerei loirionon komaeete abebenoka." Eebo. Abu ekanisa loka Methodist inom Joseph Smith aiyar. Igereesan! Aso, mam icelanaros kanuka Itulikin. Koseses, idakan idis elimuni Ebaibuli da, kwangin

34 *...amor nuakais nuipu...ka ilulun, ojai aikopo naka esabu akanike, naileleba italesio ka asilianut naka adoteuke, akesisianakineta, nuakoranari ngesi, komasete ikabakan luka akwap.*

Idiotunganan kere tikiyuu ngun, tikepedo aiyyun ikee Onac Jagger luebitamin, ebe, "ipedori jo aicokicokikin akipi nejai aberu nadau ikar akaisauni edukosi kede ikiliokit, ido kojaas kede atukos naidwe, kosodi aituluor nges bobo kiton araun abekot kosodi aijukar nges oitaada loeterane akuar ngini kede okilenike." Idiotunganan kere epedori aiyyun ebe epedorete akipi nukalaunak aswam ngun, epedori aiyyun idiobore. Edolit ngini.

Konye ikabakan luka akwap iswamaete iboro kwanat kangun. Erai tetere kes epedorete ajar kojaas kede ainapakin. Kotoma otaukon, ijeni ijo ebe ibosit. Eyangaikini aokot nuka Yesu Kristo aitalaun jo. Konye koany, ajai ngesi toma okanisa losodit loaponi kitaraunai erionget, inera Ebaibuli nuke kane.

35 *Iwadikatete da oreteke ekiror loka aiyeiyea ebe, BABULON LOKAPOLON, TOTO NAKA NUDOTE, KA ITALESIO DA LUKA AKWAP.*

Kwana kosesen. Ibuni oni kere acamanar. Ido itaabon obe luka Iromayon, itaabon obe luka Atulik, ecamunitos ebe erai ngol ekanisa loka Rome. Ecamanara ikecetaabon obe kede ngun. Ajaatatar kede loenyaritai ebe, "Nukabeit Nuka Aiyyuniwok," erai loebait isasedotin bon. Abu atulikit ibelokin aiyyun...na, arai ekesapat esasedoti, kosodi ainakin eong eitaabo. Kosodi ngesi aijodoor ya abongor akanisake; obuni aomun, konye mam apedori ainakin nges. Abu eong edar nges kanuka aitogogonget, akoto eong ajeni

nuenera. Nealimuna eong ibore, ekoto eong ajeni nges. Ebeit Edeke aingitar eong nukeng.

36 Ido kiitu, anyaritari nges "BABULON NAKAIYEIYEA." Ijeni oni ebe erai ngin akanisa naka Atulik. Konye, kosesen, erai ngesi "TOTO NAKA KANUDOTE." Inyobo amalayat? Ibore ngipengin yenerai ngesi, naadote. Kwana, aibo aponiata iriongeta lu? Totokec ngin. Kanu ageuna, ngun kes eraas kesi. Do ijo atemar ebe, "Lokasuruo loka Kristo nges ngol, dobodo iriongetawok? Kwape amalayat ka naadote, eputo ibore ngipengin, "aswam adoteu, aswam aelo," acamunun iboro lukaingal kanuka aomisio ka acoa naka itunga. Kwape ebalar Ebaibuli, "Aisisianakin aicorakineta nukaitunga." Ngin nges ibore yenenyaritari ekanisa lolo, naesurokinit akabakanut naka Edeke.

37 Kwape kotoma Aitutuket namojong. Akoto Edeke araut Ekabaka loka Isirael, eroko erauna Ekanisa, ido arai Ngesi Ekabaka. Ido karaida ejaatatar kesi enabi, Samuel, etunganan lokajokan, ido nekelimokina ngesi kes ngun, arai akotosi Ekanisa. Konye akotosi kesi aputokin kede kaluce itunga kere. Akotosi kesi aputokin kede Ipilistian.

Ngin nges ationis kede itunga lueraasi Igereesan. Mam kes ekotosi ajalakin ibore yenajokan kosalak kwape kajaar. Bon kes...Nekedoikina kes Emoyo Lokalaunan kokau kangina, ikar akaisaongon kau, kosodi apedor ageun abukunun, kosodete kesi agear ekosio ka acelanar, ka einer kede angajepa, mam kes ekotosi ajalakin ngin kosalak kwape kajaar. Ajai kes aitarauun ngin erionget. Obuni do bobo ece, kosodete anyara kes ebe General Council. Obuni bobo ece, kede aica adio kotoma Okiror, Yesu Kristo, kosodete anyara ngul ebe "New Issues" kosodete ainger kes. Kosodete adumakin kes erionget loenyaritari P.A. loka J.C., Pentecostal Assemblies of Jesus Krist. Olomuni aretonokin adio kakidingosikec, arai ebuni Ngesi ibwanenit abalsit kwangin arai eipone loabeitor Nges abunore, kosodete aswamaun bobo ecerionget, komaikinete P.A loka W., Pentecostal of the World. Oo, ikatunga! Ikatunga! Obuni do bobo loenyaritari Church of God. Kosodete atiakar kanuka adwaranut, iswamaunete bobo erionget. Kanginipak naiswama ijo ngin, ilomari ijo kinga naka akote naka Edeke. Emoyo lokasurup loka Kristo!

38 Ekanisa loka Edeke Ilajaara. Ekanisa loka Edeke emameete kede ikoruon, naarai, anyoun angolol kiton angolol ejai Edeke, kanginitungnan kokwap naka akolong erai yeniKe. Arai ajai ngesi Atulik, agereesan arai kere nuerai ngesi, emoot Edeke ngul lueinakina kotauon. Ido kitajaritari oni kanuka aiyuun, aiyuun Nges. Ngol nges Ekanisa. Kwana, itei jo, mam Ekanis erai erionget.

Ido kangolisawa kere lokianyunia ijo erionget, iitu aitun ebe, "lokasurup loka Kristo" nges iwadikatai kujuke. Ena kane kotoma Obaibuli. Idelelei ngin kwape kipedoria ijo asiomun. Kijaar-kijaar eong ipapero luipu luketiai iboiete kane, loelomunitos orionget, mam eong abala ebe irai ijo lokasururp loka Kristo. Mam eong anyari ijo kwangin. Konye kau kotoma obore ngin kere, ido esubit bala ejeraki ajokit ngin kiton neekotor ijo kojaas ber kede ibore kwanat kangin arai mere kwangin mam kes epote acamakini ijo karaida alimonokin.

Ibore ngipengi ejaatatar akwapin da. Mam ijo ipedori araut etunganan loemamei akwap. Ekoto ber ijo kojaas kede akwap nenice. Ejai ijo araut arai loka Amerika, German, arai icebore. Itei jo, ejerakin kere.

39 Aso, ebeit, Ekristayot obe loilelebasi kede Emoy Lokalaunan erai nepetai loemamekt ewai. Kakonyen nuka akwap erai ngesi.....Konye akonyen nuka Edeke erai ngesi loka etiai. Korai ti oni ajaas kede apak alosit nejaas Iburanian 11, kasodete aanyun (eipone lo) ikajiok ngul lika aiyuun. Eipone loabu Aburaam olomuna kinga kosodi anyara akekuan ebe ikaloton ka epejonon, ebala ebe arai akwap na buke konye eiriai ngesi airia, komoote Ere loerai ekedukon ka ekasubanike Edeke. "Ido arai, kitwakit oni kotoma Kristo, iraun oni aur naka Aburaam, ido irai ikerumakaKe, kanuka aisumunet." Ido inyobodo kitarauni ngin oni? Ikalotok ka ikarimok.

40 Nealomuna Isirael koMisiri. Ajai Moab, akwap napolon nasipo. Ajai bobo Esau da, akwap napolon kosipo. Ido ajai Isirael, namam arai ediini, ebunit. Lukere, ajaasi, toma Akirot. Kiitu ebe abu Balaam koinak asubanit kwape kana abu Isirael koinak, itemuan ikanykaarei, kwa epudar Edeke. Asubanasia akanykaarei nualaete, imerekekin ikanykaarei, kineraas abunore naka kalo Edolit. Kotoma abeit, kesi kere adolitos, kinerasi nuebecokina. Konye nuabu okurwok Balaam aanyun, abu okurwok ngesi aanyun apedor naka Edeke akidingos naka Isirael, atukot ngin najaas idiinin kere toma. Komamei aboisit naloto, irimete airim, konye ajaas kesi orotokec alosit nenice.

Eipone ngol nges ejaar Ekanisa loka edeke Lokajaran lolo. Mam erai erionget, kanejaas akwapin. Konye ibumakina nepepe, mere kede aeneta nuka erioget, konye kede apedor ka Emoyo loka Yesu Kristo, kede aeneta nuka amin.

41 Einakini lo Methodist ka lo Baptist ararapr nginidiopet epur, kosodi atemar, "Onaceka loetiai," Neantyuniata kesi ebe mam epedorete aupakin nepepe komam ecamanara.

Ebalas itunga ebe, "Ijo irai Ikristayot?"

"Erai eong lo Baptist." Mam ngin ebongokini aingiset, cut. "Eong arai Ikristayot? Arai eong lo Pentekosit." Mam ngin ebongokini aingiset.

Arai irai ijo Ikristayot, irai do ijo isubat yeniurunitai irwan nasodit. Ijai do ijo toma-toma Akabakanut naka aiyeiyea naka Edeke. Mam akonikonye ejaas oboro luka akwap, konye nejaas iboro luka akuj. Ido kanen do nges ijaar ijo toma Okanisa. Ngol nges Ekanisa. Mam erai erionget. Kopupokisi eonga ejok. Mam cut epedori araut erionget. Mam cut Ekanisa loka Edeke lokajaran rpedori araut adiotukot. Mam epedori araut erionget. Ejai araut akuan naka aiyeiyea, Emoyo Lokalaunan. Aidulokin mot, arai idum oni apak, ibuni alomar cut toma kangin.

42 Kwana, kwana kianyu ijo apolou naka Ekanisa? Apolou naka Ekanisa erai "luenyaraunitai kinga" atukos, itunga luenyaraunitai kinga luipugat bon Ekabaka loka Akabakanut kana naka Mesia. Oo, ngun mam eumokina? [Kotemari atukos ebe, "Amen."-Ekewa.] Amina eong ngun. Neasiomia eong ngun kotoma...lolo. Neabu kolimuna kangina ebe, "Akabakanut, Akabakanut naka Mesia." Abu ekewadikan ibwaik ebe, "Akabakanut naka Mesia." Abala bobo ekewadikan ebe, "Emamei ibore kwanat kangin ebe Ekanisa loka Edeke Lokajaran araut erionget. Erionget erai ebore yenetapuno, aikopak, ayangar aboisit naka."

43 Eipone ngon cut nges ayaunere aisisianakineta nuka aingal nu kere toma, ayangar aiboisit naka kana erai nakabeit. Ngin nges apolou naetingitor aberu aikopo naka asilianut naka italesioke akaninike. Kwana, iseseni ijo, mam eong abala ebe...Ikamunitos Ipentekootin akiro kwape ka Itulikan, arai Pilgrim Holiness, arai Nazarene, arai Baptist. Konye ejaas Edeke kede idwe toma okanisan kangul kere luka idiinin. Ejaas toma Akabakanut naka aiyeiyea. Ibore bon yenidaritos kesi nges aanyun ebe iswamaun icebore, yenebuni airiar ikecetaun tomake. Eyalama eong noi atibong na ajenun, ebe, ejaas abunenen anyoun kokide kiton to, agolitome ka angalakimak, alomununete kinga, komaete, kidaritos Abunore naka Ejakait. Abala Ebaibuli ebe apote kesi aswam ngun kotoma apaarasia nukawasia. Erai ngin cut naedolit. Ido abala ebe, "Apote akerit kide kiton to, agolitomei ka angalakimak, emootos Akirot nakabeit naka Edeke; etengei mere loka atap ka akipi, konye loka airar Akirot naka Edeke."

Ekotosi kesi ijo, "Obua koloma toma kana. Obua koloma toma kana." Emamei ibore yenilomari ijo alomar. Kotoma ajakanut naka Edeke, emamei ibore karaida idiopet yenipedori ijo alomar alomar. Erai ejautene loka aurikinio toma Okanisa, mere alomar alomar toma kangol. Kwana, aticepak abuni eong alomar aiyatakin toma kangin mot, kotoma adakikat. Kijaar eong icekokoron luipu iwadikatai ngina.

44 Konye kwana alototo ber oni toma aomisioit nakiareit, tetere oni itami angetakin kere. Ingaibo asipokin ngin, nges atemar, Akuan na naka aiyeiyea? Ingaibo ageuni Na? Yesu Kristo. Ido erai...Nges erai Akou naka Akuan naka aiyeiyea. Nges erai Ekabaka nejai ngin, iswamai Akekote Elopel kotoma Apuganike. Mere apugan naka ekaanyanaran arai apugan naka atukot naka ekanisa; konye Ekabaka, loerai Mesia Elopel iswamai kotoma apuganike Elopel. Iwori bo ageunor? Ko Pentekosit. Mere erionget loko Pentekosit; akiro nuapotu iswamaunos ko Pentekosit. Nen nges agearor kede ijo. Enerit Ngesi nuka abunore naka kangin. Abu kolim nuapote. Alimunit ebe abeit abunore.

45 Kwana, arai ikoto oni, ipedori oni apukor kotoma Luka esula lo 24, ekokoro lo 49, ido ipedori oni aanyun kane, ogeu aisiom ikokoron lu tetere itunga luejaas aiwadik iwadikaete. Luka 24:49, kianyuni nuabala Ngesi.

Ido, koany, kejukakini yes aisumunet naka papa; konye kiboikinos ore, aitodol nekitanapere yes apedor naebuni kokuju.

Kwana, Abu Kisumu nuka Ekanisa loebunit, Akabakanut naebunit. Kwana, opuko kama ejai Aswamisio nuka Iyakia 1:8. Kwana, kiitu, Abu bobo Ngesi kiner kotma Matayo 16:18, nuka, "Toma atiida na," Abuni Ngesi aiduk Ekekanisa, "ido mam ikirigin luka okatwak ipikorete." Ilosi oni adolokin toma kangin kotoma odakikan idis, kwape kijesaror alomar akirot ace. Aswamisio nuka iyakia 1:8.

Konye, idumunete agogong edau...Emoyo Lokalaunan adoikin yes: iraunete yesi ikakajenak kotoma Yerusalem,...ka Yudaya,...Samaria, kiton osange da loka akwap.

Akabakanut naka ikajenak naebunit: Ikekajenak luka luka Akejarun, ikekajenak luka Akepedor, ikajenakaKe, luaraut luejarete. "Iraas yes ikekajenakaKa," kwana, Aswamisio nuka iyakia 1:8.

46 Aso idumini bobo oni ebe kama ejaas Ipeson esula losodit, ikokoron 22, yes luiwadikaete. Ipu noi kangun nuebeit aiwadik, konye kanu aibubukin ngin ejok, kanu aanyun ejok ebe i...ingoliari jo ngin. Eebo. Ekokoro lo 22 loka Ipeson, esula lo 1.

Ido, kitonokik iboro kere kwap kakejeneke (Kristo Ngol), koinak da Nges araun akou ayait iboro kere kamaka ekanisa,

Loerai akekuan, aitegoro naka ngol loitekori kere toma kere.

Ingaibo apesikini ekanisa lo? Yesu Kristo. Emamei ekaanyanaran, emamei atukos naka itunga, emamei ipaapa, emameete apedorosio nuka Itunga, nepecepe da. Konye abu Yesu Kristo iner nuka ngin araut Akekabakanut na ajai alomun aipuga. "Ebwoete ice kane..." esula lo 16 loka Matayo, "abeit katemari yes

atiar, ebwoete ice kane lumam epote air cut atwanare kiton naeanyuniata Akabakanut naka Edeke ebuni kotoma apedor." Aparaaasis adis bon akaulo kangun, aponi Nges kibubuikina, kosodi Emoyo Lokalaunan adoun. "Ebwoete ice kane, lumam iirete atwanare kiton neanyuniata Akabakanut naka Edeke."

47 Kingitata Nges Iyudayan ebe, "Ijo ibuni kereka ainyakakin Akabakanut kapak kana?"

Kotema atiar, "Mam erai nakus aijen apak ka apakio, nuebwaiki Papa toma aijeneke Elopet. Konye idumunete apedor." Aswamisio nuka Iyakia 1, "Idumunete apedor edau Emoyo Lokalaunan adoikin yes." Idumuni apedor akaulo naitaraunere ekaanyanaran, akaulo nakitaraunere ijo ekalimonokinan, akaulo nakitaraunere ijo ipaapa, akualo nakitaraunere ijo esasedoti? "Idumunete apedor kebu Emoyo Lokalaunan mamakus." Ngol nges ekajenan loedarit Edeke, ekekajenan akaulo nadauna Emoyo Lokalaunan abunore. Mere ekajenan ebe arai eong ekaanyanaran, mere ekajenan ebe arai eong ecokon. Konye ekajenan (loka inyo?) loka Ekabaka loitajaraunitai. Ngol nges Ekanisa lokabeit loka Edeke lokajaran. Eebo.

48 Ido kama ejaas Ikolosain da 1:17 ka 18, ti ber oni isiom lo eroko oni ijai toma kangin. Ikolosain 1:17 ka ekokoro lo 18.

Egeikete nges iboron kere, ibore kere nepepe kotomakeng.

Erai ngesi da akou naka akuan, nges ekanisa; erai ngesi ageunet, ekiyai kotoma okatwak, tetere eraun ngesi elopet losodit kotoma kere.

Loerai Akou naka Ekanisa? Yesu Kristo. Ani bo Akabakanut ngin? Akabakanut naka Mesia, Ekanisa, mere erionget; Ekanisa, Akuan naka aiyeiyea naerai Kristo Akouke. Oo, amina eong ngin, alosit kotoma Omoyo, arimarit Ekabaka. Aibangubanguna kama ejai kwap; loketiai kakonyen nuka Edeke. Alosit kotoma Omoyo; mam amisiikinitai, okenatere, koboliare. "Kere lueyongitos Edeke kotoma Kristo Yesu apote aitor areo. Arai apotu koreata inabin lukigeikinite yes, konyarata Lokapolon loka-Lokapolon loka aduketait ebe, 'Ebelesebul,' eipone bodo ali keponiata anyara kes lueraas ikakesisiake?" konye ilosi ijo kotoma Omoyo, ibelokinite iboro luka akwap ekonipur, komam kienen kede idiorikoi. "Ngin yenalacaki Okoku elacakina cut," Amen. Ngol nges Ekanisa loka Edeke lokajaran. Ngol nges apesikini.

49 Kwana iseseni oni, kotoma ajenanut, kanejai Aswamisio nuka iyakia, Abala Ngesi, "Iraunos ikakajenak edau Emoyo Lokalaunan adoikin yes."

Inyobo Ekanisa? Akuan naka aiyeiyea naka Kristo. Ingaibo apesikini? Ejakait Yesu, Elopet. Mam aponi kopesikinai ko Rome. Karaida apesikini ko England, Jonhn Wesley. Mam arai Calvin da apesikini, arai bo ebe John Smith loko Baptist nges apesikini, ko Amerika. Mam arai karaida luko Pentekosit apisikinite, ko California. Yesu Krist nges apesikini, Ekabaka loka Akabakanut naka Mesia. Ngol nges apesikini. Erai nges Ekabaka. Ekoto ngesi araut Ekabaka. Ekoto Ngesi apugan oni. Ekoto Ngesi araut Ejakait.

50 Engautenete itunga Nges toma, kobalas ebe, "Acamakini eong Nges araun eketajaran," Konye mam ecamakinete Nges araun Ejakait. Ejakait akepolu "Araut elope, aipuga." "Obua otauka, Ejakait, kitajarai eong kama ejai egeena, konye mam ilimokini eong nuebeit aswam." Ngol nges eipone loka itunga. Ngin nges apolou. Komam aumokin abala Ebaibuli ebe, "Elelebunos alekan komeesan kere." Ijeni ijo nueraas alekan. "Kwape kebongoria ekingok alekanake." Arai mam iriongeta lu apotu kopedosi aswama, kotoma apak nasodit, ido abu koyangaik Edeke alekar kes kinga; ibongo bobo ijo nejaas kesi, epote kesi ainakin ijo ailek bobo. Abala ngesi ebe, "Korai ti ijo omwana arai olilim. Konye naarai ijalang, alekari kakitukuka." Iinakin ijo Edeke adekakin akoikike, ido elekari Ngesi oni kinga.

51 Kolimokinai eong erionget edio loabu kibiror, loabu bobo kojar, kitodikinai eong kotoma akiro nukolosek neabu edio kojarunia bobo. Anyouni etunganan kede ajaanakin, kisirerengi Edeke etunganan. Ibore yenisodit yenijeni ijo, itojokaari ngesi ngin cut kosodi aitolomikin akidingos naka itunga kosodete aiswamaun erionget kotoma kangin, ido eyarakini ngin nges nepenen cut. Koany kotom akiro nukolosek kere kosodi adumun ediopet loabu konyou bobo. Emamei ediopet, naarai erai kere emoyo loksorup loka Kristo kakidingos naka itunga.

52 Kwape ka Musa, kakesi akotosi icebore yeniswamaete kesi ikulepek. "Ejakait, ijaatatar isio imeeban luipu kokar kalo." Anyoin aitegelikinet iswamauni ngin, arai imwasi ai imeeban luijatatar yesi? Mam oni imoot imeeban luka ekanisa. Imoot oni imeeban luka Akuan naka Kristo, lueuruunitai toma Akabakanut naka Edeke, "Mere kede akote naka Etunganan, konye kotoma akote naka Edeke," Mere kede emoyo loka etunganan arai acoa naka etunganan.

Abala Paul ebe, "Mam eong abu kabu mamakus kede acoa naka etunungan. Abu eong kabu mamakus kede Emoyo loka Edeke ka apedor naka Akejarun, tetere mam akusiyuun esipokin toma acoa arai akiro nuijodoete nuka etunganan, konye kotoma apedor naka ajarun naka Yesu Kristo." Ngun kes ayaunenei ngesi toma. Kingarak Edeke oni, ebe kiswamai oni da ibore ngipengin.

53 Kwana, mam ikoto ayangaikin apak naepol kotoma kanginidlope kakesi, kwana akoto ajenun: Inyobo aisiraret naka ekanisa? Inyobo ebeit ekanisa lo aisanakin? Inyobo aisiraret?

Aisiraret nakasodit na apedori eong aoomoom, ebe, abuni ekanisa lo (akuan naka aiyeiyea) aisisianakin, eraun aitoronokin. Aso apukosi Luka 24 bobo, ipak edit. Luka esula 24. Ibore yenisodit yenebeit ekanisa aswam, nges aitoronokin, ido ebuni aisianakin aitoronokin. Kwana, ajai Yesu, akapanakin anyoun, erai lo esula lokawasia, nejaar Ngesi akapanakin anyoun akwap. Luka 24:46, kageutu kede ekokoro lo 46.

Kotema kes atiar, kwangin iwadikatai ebe ibusakinit Kristo aiticanio, ka ajarun da kotoma okatwak kaparan nakiuniet:

Ebe da elimonokinio atekerin kere kokirorike aitoronokin ka aisionio naka adiaakanareta...

Oo, akoto eong ngin koloma toma cut, naarai ajai eong adolokin icebore kotoma adakikat, kotoma kangun, "asionio naka adiaakanareta."

...aitoronokin mama ejai Edeke ka asionio naka adiaakanareta elimonokinio Kokirorike atekerin kere, agear ko Yerusalem.

Iraas yesi da ikajenak luka akiro kangun.

54 Ngin nges aisiraret naka ekanisa, ekajenan loka aisiraret. Aitoronokin ka aisionio naka adiaakanareta ekoto kolimonokinai katekerin kere, egeuni ko Yerusalem. Oo, aibuses! Aiboer ageunotor iriongeta? Yerusalem? Mam cut, ipa, egeuna ko Rome. Inyobo abu kogeun ko Yerusalem? Aibatisao naka Emoyo Lokalaunan, aibatisao kokiror loka Yesu kanuka aisionio naka adiaakanareta; aitoronokin mama ejai Edeke. Abu ngin kogeun koYerusalem ido ebeit kolot kiton atekerin kere. Aleluia! Itei jo ngin? Ebalasi ikokoron ebe, "Ebusakinit Yesu aiticanio. Ngesi lo enerit enabi nuke. Ngesi loinera Ebaibuli kere nuke, irimirime Nges. Abeit cut ti nges ejenu nuibusakinit aisisianakin, "Ebeit aitoronokin ka asionio naka adiaakanareta atekerin kere kanuka ajenanut, ageun ko Yerusalem."

Kwana, ageuni erionget ko Rome. Ageuni ekanisa loka erionget ko Rome; kobuni Germany, kanuka Martin Luther; kiton England kanuka Wesley; kiton United States, kanuka John Smith; California, kanuka Pentekosit.

Konye ageuni Ekanisa ko Yerusalem. "Aitoronokin mama ejai Edeke, ka abatisao naka Kokiror loka Ejakait Yesu Kristo kanuka aisionio naka adiaakanareta, ageun ko Yerusalem. Ido ebeit..." "Ebeit," Abala Nges. Mam Nges abala ebe apote kesi kere adolokin ngin. "Ebeit ogeu. Ebeit kolot akwap kere. Ebeit olimonokinai." Konye ejaas idis noi lukangin. Konye ngun kes nuabala Ngesi, Aisirareteke, ngin nges Aisiraret naka Ekanisa. Kitodikinai eong ekanisa loisisianakini ngin. Kolimok eong nejai ngol. Mam ijo idumuni.

55 Kwana, Yesu nges Ekabaka, Aisiraret nakiareit. Yesu nges Ekabaka, ido ejari Ngesi apaarasia kere. Ngun kes ebeit Ekanisa aisisianakin. Matayo 28:20.

Kisisianakinete kes aricit akiro kere nuicorakinit yes; ido koany, ajai eong nenipe kayes apaarasia kere, kiton awasia naka akwap.

Ngun eraas nukabeit? [Kotemari atukos ebe, "Amen."-Ekewa.] Iburanian 13:8, "Yesu Kristo ngopengol bian, lolo, ka ikar lumam edaunos." Ngin nges Aisiraret naka Ekanisa: aswam Akeswam, aitogogong Akejarun, ka aitejenanar ajenanuto.

Kwana, Aswamisio nuka iyakia 5:32, neianyunia oni arai ajaatatar kes ngin arai mam. Kwape kipukoria, Aswamisio nuka iyakia, esula lo 5, ekokoro lo

Kirai isio ikajenak luka akiro kangun, nepepe ka Emoyo Lokalaunan, loainak Edeke kere luerimasi nges

Ebeit Ngesi kitejenaarai.

56 Einakinit Ngesi aisisianakin kotoma, Yokana 14:12, nuibeit Ekanisa aswam.

Kotoma Yokana, esula lo 14, e...ekokoro lo 12, ianyuni oni nuebala nen. Yokana 14:12, Aso asiomata, esideleleutu ngin. Eebo. Yokana 14, ido ekokoro lo 12.

Abeit, abeit, katemari yes atiar, yenikeyuuni eong, iswamai ngesi da aswamisio nueswamai eong; iswamai da aswamisio nuitelekarito ngun, naarai alosi nejai Papa.

Ngin nges Aisiraret naka Ekanisa, "Yesu Kristo ngopengol bian, lolo, ka ikar kere," Ejari kotoma Okanisa, abu kojaru okatwak. "Nges ngopengol bian lolo ka ikar kere," iwsamai aswamisio ngupengun, iswamai iboro ngupengun lueswamat Yesu. Ngin nges Aisiraret naka Ekanisa. Arai mam Ekanisa isisianakini Ngun, ejai do aisisianakin acekiro nuka aingal nuka ediini. Ngun kes abu Yesu kicorak kes alimonokin.

57 Inyo bobo icebore ejaun? Eipone boa li ijenuna oni arai itunga lu...Ebalas kesi ebe, "Eebo, arai eong

ekeyuunan." Aanyutu ber oni nuarai Akeyakian nakawasia nejai Ekanisake, kanuka eyuunak, Marako 16. Opuko Marako, esula lo 16, ido idumuni oni nuarai ayakian nakawasia mama ejai Ekanisa, ido ibuni oni aanyun arai itupakinit oni Akeyakian. Marako 16, ageutu kokokoro lo 14.

Kokau kitakanikin lutomon ka lodiopet, arai nen akulo naka Akejarun, iboiete enyamete,...

Ejai ne ayakian naka Ekanisa kwana, kopupok, ayakian nakawasia. Ibuni oni aanyanakin, arai tope kirai oni ikeyuunak, arai ebe ijai tope oni Okanisake, arai mam.

Kokau kitakanikin lutomon ka lodiopet, iboiete enyamete; kitoron kanumam iyuunniata ka aninik naka ikcetauon, naarai mam apotu kiyuutu ngul lukeanyunete nges kedau ajarun okatwak.

58 Aanyunit icetunganan Nges. Atamit icetunganan alimokin kes nuikamunitos ngin, ido mam apotu kiyuutu ngin. Arai mam ngin kwapekwangin lolo. Kijeni oni ebe ejari Ngesi, kijaar oni ajenanut naka Ekemoyo tomawok. Kiseseni oni Akepedor elosi kosipan ido itomoneta luka ilukumin luka itunga, kosodi amisiikin aomisiokec-aomisiokec ka itauon cut kwape abu Ngesi kiswamator nekejaara ne. kwape kabalar Ebaibuli, "Akirot naka Edeke." Ido erai Ngesi Akirot naka Edeke. "Kageunet ajai Akirot, kojai Akirot mama ejai Edeke korai Akrot Edeke. Orau Akirot akua nkiboienenei kamawok." "Akirot naka Edeke, ekwana adepar ekileng loekwana iwaitin iarei kere, ipelori da kiton aitiak ajar ka emoyo, ailenyeta ka asum, emisiikin da aomisio ka nuelosiinit etau." Kristo, "Aswamisio nueswamai eong iswamaete yesi da." Aanyunotor Nges iswamai ngun. Imwasi bo ai aanyunitotor Nges iswamai ngun? [Kotemari atukos ebe "Amen."-Ekewa.] Abeit cut. Ijeni oni ebe iswamai Ngesi ngun. Ejari Ngesi kane. ejai Ngesi otauonowok.

59 Mam kes kiyuunitos ngin. Mam keyuunitos ngin kolo da. Mam kiyuunitos ngin kwana da. Iyuunitos ebe, "Abu Ngesi kotwana, odaun kwangin. Ido kijaatatar oni kede icebore yenesubit bala ibore yenikolosek, yenabu ekesa ece kitolom ikar idis kau kosodi apesikin ekanisa, kosodi aiwadik atikasimu, ido ngun kes isipokina oni toma." Erai ngin nakapiirit. Abeit! Eramei abeit kotom kangun. Oh, mam eong abala ebe "abeit," Epedori etungnanan kiswamate ngin. Epedopri etungnanan korai loeinakin noi. Konye mam Edeke eyait Ekekanisa kwangin. Mam Ngesi kipudakinar ngin

60 Nakelipatar kesi ekabaka, abu Samuel konyaru kes kosodi atemar na. Ebalala ebe "Akoto eong aingit yes icebore. Eong ekurwokinitor? Eong elipitor idio kotoma kayesi ikusikapun? Eong alimokinitor yes imodiobore kokiror loka Ejakait idimarai yenedolit? Mam Edeke ekoto yes ajaut kede ekabaka. Ekoto Ngesi yes ajaut kede Ekabaka."

Ebalala ebe, "Wu Samuel, abeit, idolit ijo. Irai enabi lokajokan. Mam ijo kilimokinitor isio imodiobore dimarai Abeit. Mam ijo ilipitor isio isirigin. Iboro kere eraas abeit. Konye ikoto isio da aputokin kede luce kere. Ikoto isio ekabaka, kwapekwangin."

Kosodi Samuel atemar, "Ebuni aidupor yes iduminete ariebo naka itauon ka atiokisio. Elosi...Elosi ngesi ayangar isapakus ka apesur. Elosi amunar kes, kotoma oboro luebuni ngesi aswam. Ebuni aswam ngun." Ido abu kiswama. Konye, karaida ejaas ngun, akotosi kesi ekabaka.

61 Koipone kangol kiswamata lolo. Oo, ikoto oni ojai ber ekiror ece loekodakina kede oni. Loebeit oni alimonokin itunga nekingisiata oni, "Irai isio luka Methodist, Baptist." Otekma atemar ebe irai ijo Ikristayot, edolit ngin, "Eput naka Kristo." Akaulo naka Nges ajaru okatwak, mam aporu kiyuutu ngin.

Kotema ngesi kes atiar, (koany ayakian napolon), Kolototo yesi...

Alalau bo naitia kakwap? [Kotemar atukos ebe, "Kere."-Ekewa.] "Oo, aomit eong ebe, Yerusalem bon." Abu icetungan kotema, "Ebe apotu aanyununeta nu kolototo Yerusalem bon."

...akwap kere, kolimonokisi akiro nukajokak...

62 Imwasi bo ai ejenete inyobo akiro nukajokak? [Kotemari atukos ebe, "Amen."-Ekewa.] Mere "Akirot." [Ibabapi Onac Branham Ebaibulike.] Abala Paul "Mam akiro nukajokak kipunikinitos oni kotoma Akirot bon, konye kede apedor ka atodianareta nuka Emoyo Lokalaunan." Akiro nukajokak nges apedor naka Edeke ainakin Akirot aswam nuebala ngesi ebe ebuni aswam

"Kolimonokis Akiro nukajokak, akwapisinei kere." Kolimonokis Akiro nukajokak nejaas itunga luka akwangak bon, arai luarengak, ludosoik, luriokok?

...Nejai nginisubat kere.

Amen. "Nginisubat kere." Iyuunit ijo ebe epeleikinit ngin ngun? [Kotemari atukos ebe, "Amen."-Ekewa.] Aanyunitor eong Edeke itikokini emong, adiopepaaran. Aanyunit eong Nges einakini ituturo mam aikony. Aanyunitor eong Nges itangaleuni ebebelei, loabu operi etwanit, akuar kere. "Kanginisubat kere." Akiro nukajokak epote aswam idiobore kere yenilipi ijo.

Ibala ijo ebe, "Ibucara ngin, Onac Branham." Mam ngin ibucara.

63 Abu Yesu kolimok ekitoi ebe "Ikenitai ijo, emamei bobo etunganan loenyami kamakon, ageun lolo." Ido aponi kolominokinai akiro nukajokak mama ejai ekitoi ngol. Amen. Eumokina! Apupi eong aimoyoikit, kwape kwana.

"Nejaas isuban kere." Amen. Alimonokin ngin nejai inyo? "Kanginisubat." Oo, korai ti oni ajaatatar apak kanuka iboro kalu.

Kwana, ngin yeniyuuni ibatisai itajario;...

"Oo, eyuunit eong, ibatisatai eong." Edolit. Ejok. Eebo.

Ngin yeniyuuni ibatsiai itajario;...ngin yenimam iyuuni itelekarete akiro.

Oo, eyalama eong noi ebe arai eong ekeyuunan." Idarek ipak edit. "Ido," ejai airiamet naerucokinit ekokoro nepepe.

Ido etupanakinete aanyuneta nu...

Oo, aomit eong ebe mam ijo iyuunit aanyunet. Akiroke ka Yesu ngun Obe. Kopegata ijo kede kaNges.

*...etupanakinete aanyuneta... (Mere ebe "aticepak; acepaarasia etupanakinete.")...
etupanakinete nu ngul luyyuunete;...*

64 Kwana ilosi oni aanyun arai iyuunit ijo arai mam. Ilosi oni aanyun arai iyuunit ekonirionget arai mam. Epedorete kesi atemar ebe iyuunitos. Abala Yesu ebe, "Etupanakinete aanyuneta nu ngun luyyuunete." Inyobo engerito kesi aanyuneta ngun.

*...etupanakinete aanyuneta nu ngul luyyuunete; (Imwasi bo ai?) kokirorika iriengearrete
ajokin;...*

Ido yesi lumam iyuunito aitangal naka Edeke, yesi ikanisan! Itepingao nu, imisiikinitos yesi. Mam eong ajai einer kede yesi bon. Elosi icetunganan airar ngin. Kolimo ebe iyuunit ijo Edeke, kosodi aiyuun ayakian, ebe iyakiaritai ekonikanisa ayangar Akiro nukajokak; ido ibore yenisodit cut nges Aitangal naka Edeke.

Inyobo arai ibore yenisodit yenabu Yesu kolimok ikakesisiakake nakejukaria kes kinga? Matayo 10:1 "Kitangalete lukadekak, irengearrete ajokin." Inyobo arai ibore yenawasia yenabu Ngesi olimok Ekanisa? "Kitangalete lukadekak, irengearrete ajokin." Olupa kede Omega; Benjamin ka Reuben; Losodit ka loawasia; Ngol loajai, loejai, ka loebunit; aicerit naka atupuruc; aliasit ka aur naka Daudi. Aleluia! Ngesi ngol. Eebo, ipa.

"Etupanakinete aanyuneta nu ngul, luyyuunete. Kokirorika irengearrete ajokin." Ko Yerusalem bon? "Akwap kere, ka nejai nginisubat kere." Ngin erai Ebaibuli? [Kotemari atukos ebe, "Amen."-Ekewa.] Abala kwangin. Ngin nges Aisiraret naka Ekanisa. "Akwap kere, kanginisubat, Akiro nukajokak. Nejai nginitunganan yeniyuuni, etupanakinete aanyuneta nu."

65 *...kokirorika irengearrete ajokin; kinenanasi angajepa nutetiak;*

Ido yes Nazarenes lukican inyaritos kes ebe abunget naka itunga "luangajepa." Mam yes ikotosi karaida aiboikin kede kes okanisa. Ngin mam erai namam ibusakinit? Anyoika ibuni ijo aswam idol ijo kuju? Abu Yesu kotwana, inera angajepa. Abalas ebe "Abu kiner, ido abu kiner kede acengajep." Abeit cut. Abu kiner. "Abu iner kotoma Aburianian." Mam. Mam ngin erai aiwadikaet naka Iburanian. Abu iner kede angajep nakotoma Akuj.

66 Neabu-neabu Abel koinakina imerekekike katiida, nakejaar imerekek yenididi atwanare, ajai ngesi aitub ngin komorosong. Aitupuset naka Kristo, kokau kangina kotoma omanikor loka Eden, imerekek yenididi emonyi kotoma angajep ace, kwape katwania. Etupusit ngin, kwape kelongarar akejul kede aokotoke elopet. Etupusit Okoku loka Edeke ikaja kokau kangina ko Calvary, ejepejetai kiton araan atutuben, kede adiakanaaretawok, ejai etwanare, kiner kotoma angajep ace, "Ekadeke, Ekadeke, kanukinyo kijalia Ijo Eong?"

67 Ngin nges Aisiraret naka Ekanisa. "Kokirorika irengearrete ajokin; kinerenanas Ngajepa nutetiak." Ngun kes abala Ngesi. Ngin nges Aisiraret naka Ekanisa. Ngun kes abu Ngesi kicorak Ekanisa aswam, "airengearrete ajokin; kinerenanas angajepa nutetiak."

*Ikamununete imunwo; karaida kemata ibore yenikaaran, mam isiriebi kes cut;
idokonokinete lukadekak akecekanin engaleunete.*

Ngin nges ayakian naka Ekanisa. Ekanisa obe, loiyuunit.

Ngin isisianakinio kokanisa lo Methodist, Baptist, Presbyterian, Atulik, Lutheran, Nazarene, Pilgrim

Holiness? [Kotemari atukos, "Mam."-Ekewa.] Mam, ipa. Engeritos ngin. Aibuses! Arautu erionget, ido mam epedorete aswam ngun. Ipu itunga kotoma kangina luyunitos Ngin, konye mam epedori alimun idiobore yen ikamunit ngin, naarai aponi kogoloritete nges. Emoyo ngol loka lokasurup loka Kristo, nges etarauni kes erionget.

Ekanisa loka Edeke erai loejaas ka aurio naka atitai naka Emoyo Lokalaunan, mam ipuda edio ediini. Etupitos Ekabaka loka Akabakanut naka Mesia. Mam kes ebeit ayangar akiro nuka itunga. Eurunitai kes titai, elacakinitai kes Okoku Loetarauni kes luelacakina cut. Etupanakinete aanyuneta nu kes.

68 Elimonkinio eijiri lo. Ingaibo elosi alimonokin nges? Epedorit Edeke alemun luemamei aijen. Epedorit Edeke aitonyoun amor, kanuka idwe mama ejai Aburaam. Epedori Edeke aswam nuekoto aswam. Erai ngesi Edeke, ido eipone ngol iswama Ngesi. Neabunio Ngesi, mam abu konyarau Kaiapa. Mam abu konyarai esasedoti ediopet. Mam abu konyarau loesisiat akiro nuka ediini. Abu kalem ekamak agaria, ikecokok amerekekin, ka luamamei aijen ka lumam asiomitos. Abala Ebaibuli, ebe, "Petero ka Yokana kere amamei aijen ido mam esisiatos." Konye apedori Ngesi ainakin kes ka aswam kamakec, Akabakanut naka Edeke, kosodi aitumudak akonye ka aijen naka lukacoa ka lukapedor. Ebalas ebe, "Apotu kopupokisi ebe amamei kes aijen ido araas itunga lumam esisiatos, konye apotu kesi kopupokosi ngul, ebe ajaas ka Yesu." Kanukinyo? Ajaatatar kesi Ekemoyo kotomakec. Eswamaete kesi iboro kwape keswama Ngesi. Eswamaete kesi iboro lueswamai Ngesi. Ngupengun bec kes abala Ngesi ebe abeit aiswamaun, Akabakanut naka Mesia. Oo, eipone loeyalamar eong kanuka iboro kalu. "Etupanakinete aanyuneta nu ngul luyunete." Ejena. Epote aanyuneta atupanakin ngul luyunete.

69 Kwana, icebore yenebuni Ekanisa lo aisisianakin, ebuni araut aitangal naka Edeke, Aisiraret naka Ekanisa. Abu eong atakunite, ko Matayo 10, neabu Ngesi ijukaria Ekekanisa kinga. Alototo nejai Matayo 10:1, kasodete aanyun, adakikat bon. Kosesen nuabu Yesu kolim apak naecorakina Ngesi Ekekanisa kosodi aijukar kinga.

Kosodi...konyarau ikekesisiak itomon ka larei, koinak kes apedor mama ejaas imoyon lueroko, airengear kes, ka aitangaleun ngolipone kere loka adek ka akalanyanut da.

Ayakian nasodit mama ejai Ekekanisa.

70 Ayakian nakawasia, "Koloto yesi akwapisinei kere, kolimonokisi akiro nukajokak. Ngin yeniyuuni, ibatisao." Eong atak cut kwape kebeitor, eipone loimarunitere. "Kolototo akwapisinei kere, ka nginiteker kere, ido kitodianasi apedor naka Emoyo Lokalaunan. Ngin yeniyuuni Na ibatisai kitajario. Ngin yenengeri ngin, etubokinio. Etupanakinete aanyuneta nu luyunete: idokokinete lukadekak akanin, engaleunete; irengearrete ajokin; kinerenenasi angajepa nukitetiak. Nukes aanyuneta nuepote atupanakin." Ebalas ekokoro lokawasia ebe:

Kosodi konyoutu kwi...kolimonokis kotoma aibosio kere, kiswamai Ejakait nepepe kakes,... kitogogong akirot kanuka aanyuneta nuketupanakinete.

71 Eipone ngol ajaar Ekanisa losodit. Ido, kopupok, Abala Yesu ebe, "Arai eong Emusabibu, iraaas yesi atenu." Ido arai kitolomu atenu, emusabibu, kosodi emusabibu ngol aira araito, olibuni bobo atenu naetupakini, ebuni aira cut bec kwape abu atenu nasodit koraia.

Oo, Ibala ijo ebe, "Onac Branham, konye, ijeni jo, kosesen ber ijo ikanisan lu." Eraas ngul emusabibun lueropitai.

Kwana ipedori ijo airop araito naka emucuuga. Ipedori ijo alemun ekitoi loemucuuga kosodi aropikin nejai enimu kujuke ido ebuni apoloor. Ngun kes abu ijo oropik toma. Ido iriongeta lu eraas luabu etungan oropik toma. Erai enimu, apak kere. Ebuni apoloor naarai imakakinaitai okiror loka ekanisa. Konye akoto eong alimokin ijo arai itilibu bobo ekitoi ngol acetenu, ngesi elopit, ebuni aira emucuuga.

Ido arai itolomu apedor naka Edeke Ekekanisa, ebuni araut Pentekosit ace. Ido ebunio aiwadik Eceitaabo loka Aswamisio nuka ikiyakia kauke, abeit ngin, naarai erai Ekanisa loka Edeke.

72 Abala Yesu ebe, "Arai eong emusabibu. Iraas yesi atenu. Mam yes ipedorete aira araito kanukus, konye ejukari eong Akaijar Obe nejai atenu." Ido eipone loka araito ali abu ngin ora? "Etupanakinete aanyuneta nu luyunete."

Enyouni Ekanisa lokiareit, Akuan naka Kristo naka aiyeiyea ebuni ajaun kede aanyuneta ngupengun. "Apak edit ido mam akwapin aanyunete eong bobo. Konye yes kiyanyunete, naarai abuni eong ajaun kede kayes, toma kus da, toma kanginitenu, kiton awasia naka akwap," Yesu Kristo ngopengol bian, lolo, ka ikar kere. Ngol nges Ekanisa loka Edeke lokajaran. Ngol nges loerai ngesi. Ngul kes eipone loka ajenak kalu ejaatatar Ngesi.

73 Kwana, da bobo, ekoto Ekanisa isisianak aibatisao. Ekoto ijo ibatisai. Arai ngin nges ayakian. Abala Yesu kane ebe, kotoma Marako 16. Ibuni oni atwasam ngin aitwasam. "Yeniyuuni ibatisai." Iyu, ber,

kosodi do kibatisai kanuka aisionio naka aibucanaretakon, ido idumuni ainakinet naka Emoyo Lokalaunan.

"Ido ebuni do Emoyo Lokalaunan toma nen," ebnu araut aisisianakin naka Ekanisa. Naarai, abala Yesu ebe, kotoma Luka 24:29. Iyapikinit oni ngin cut, aso apukosi ber oni ngin apukor, ipak edit bon, ekokoro lo 49 kane. Asiomutu 26 ka 27. Kaony lo 29.

Ido, koany, kejukaki yes aisumunet naka Papa; konye kidareutu ber (aidareun akepolu "atitingikin") ore, loko Yerusalem, aitodol nekitanapere yes apedor naebuni kokuju.

Arai mam Kristo apedori acamakin aibunget naka ikiliok, luapotu koupitos kede Nges adaun ikar iuni kede atutubet, alosit alimonokin eijiri, arai mam apedorete alimonokin ediojiri kiton nakedareunatar Emoyo Lokalaunan, ejai Ekanisa da lolo aswam ibore ngipengin. Aidareun Emoyo Lokalaunan.

74 Enerasi eong kede aberu na Atulikat, kane pac, ko Oregon, kosodi nges atemar, "Eebo, ikoto ijo alimokin eong ebe atukos ngin naka ibangiok najjai ijo alimonokin, ka acalaanar ka aimony, kinyikokinitos kwangin, ipeleikinit ijo ebe epote ajaun kuju arai apugan kotoma Akuju?

Eong ebe "Eebo, toto."

Ebala ebe, "Ijeni jo, mam isio iyuunit ibore kwa kangin."

Eong ebe, "Naarai mam yes iyuunitos Akirot naka Edeke."

Ebala ngesi ebe, "Iyuunit isio ebe kingaanganakini Maria kanukosi."

Eong ebe, "Erai ngin naikapirikit noi."

Mam nges arai adeke. Arai ngesi aberu. "Toto naka Edeke," eipone bo ali tikejaunotor Edeke kede toto? "Ayogan Maria, toto naka Edeke," eipone ali tikejaunotor Edeke kede toto? Abu ngin kouru Okoku loka Edeke, Yesu Kristo. Emamei aberu naerai naka Asuban. Edakit ngesi ikinyomit yenikekiliokit. Mam etunganan erai lokasuban. Edeke esubi ajar. Erai eswamae loka-loka ainapeta loabu Edeke kibwaik, kanu aitolomunia idwe. Mam ngin, erai totoke Edeke. Mam Edeke epedori ajaut kede toto, naarai amaeotor Ngesi ageunet naka apaarasia arai angetakinet naka ajar. Erai Ngesi lomam edaun. Mam ngin epedori araun totoke Edeke.

75 Kasodi eong atemar, "Dobodo alimok eong ijo ebe akusibekot naisirerengitoi, naisesenete yesi kwape adeke, dobodo alimok eong ijo ebe mam Edeke abu kocamak ngesi alomar toma Akuj kiton nges aswam kwa keswamatar itunga ngul akuar ya?"

Ebala ebe, "Mam ngin erai nakabeit."

Eong ebe, "Ibala ijo ebe Ekanisa loka Atulik nges ewadikai Ebaibuli, ikiyakia, ido ibala ijo ebe araas kesi Itulikan? Etepegit eong ngin. Amamei ekanisa loka Atulik kiton ikar akwatauni akaulo naka atwanare naka ekiyakia lokawasia, kiton akaulo naka airiamun naka Nicene. Kitodikinai ipapula yenakiro nukolosek, idiobore yenikoto ijo; mere atikasimukus, naarai mam ngin eriakasi kede akiro nukolosek. Amamei ibore kwanat kangin." Konye abu eong atema, "Maria...Abala Ebaibuli ebe Maria, toto naka Yesu, ka angor nuce kere, ka akwatat akaisarei, kere ajai adokar amaadalai ngun alosit agoola naka okuju, kosodete aillebun kede Emoyo Lokalaunan kiton nekeriangariangatar kosubitos bala amerasi ajon, inerasi kede angajepa kosubitos bala atukos nakalu emerasi ajon. Ngun kes abala Ebaibuli." Ebwaikini eong ekabokorit okokoro. Eong ebe, "Kosiom."

Ebala ebe, "Mam eong akoto aisiom ngin. Mam ebeit eong aisiom."

76 Eong ebe, "Mam ijo irai namunot. Ne nges abu abekot Maria odumuna Emoyo Lokalaunan, kosodi einer kede angajepa kosodi airiangiangikin bala aberu naemera. Kwana, arai kilot ijo toma Akuj, mam ijo ipedori aupakin kede nges, naarai edumunit ngesi Emoyo Lokalaunan. Ido arai abu koyangaik nges aswam ngun, korai toto naka Yesu Kristo, eipone bodo ali ipudar ijo!.

Ebala ebe, "Korai kobeite eong alosit kuju kede idiobore kwape kangin, mam do ti eong akoto ajaun toma Akuju."

Katema eong ebe, "Mam iyalongongo noi. Mam iomit ebe ilosi ijo, ediopone, kwangin, dimikito ijulakin ijo. Mam iomit ebe ejaas nuipu nuebeit ijo apodokinit." Erai ngol cut bec Emoyo Lokalaunan loka Edeke.

77 "Kwana, irai ijo Ekajenanika akaulo naidoikina ijo Emoyo Lokalaunan." Kwana, inyobodo yen kwana? Inyobodo inera oni? Inyobo ngin? Ingaibo apesikini? Ido inyobo Akeisiraret? Kwana, kanu aisunyakini, alosit ngaren mot.

Ibore yeniwongonet. Eipone bo ali kiraunor oni imeeban kotomake?" eipone bo ali ilomara oni tomake? Iseseni oni nuerai ngesi, kwana inyobodo? Koipone ali kilomara oni Okanisa lo?" Mam ijo ilomari alomar. Mam ijo ipedori alomar. Emamei eipone loka alomar. Kiurikinio ijo tomake. Ajaun eong kede ekal loka

Branham, ikar akaisakany ka lodiofet, ido mam eong alomarit alomar okal, eurunitai eong kwape loka Branham. Ido iurunio, ijo kwape okoku loka Edeke arai akoku naka Edeke.

78 Alemutu ber oni Yokana, esulo lo 3, ipak edit, kasodete aanyun nuebala Ebaibuli kane nuikamunitos ngun. Koipone bodo ali ilomaria ijo Okanisa lo? Enyoin bo epelu kiinakin ijo Edeke? Yokana, esula lo 3, 1 kkiton 8.

Kojai etunganan loka Iparisayon, ekekiror Nikodemo, ekayaiton loka Iyudayan.

Kobu ngol mama ejai Yesu kuare, kotema Nges atiar, Rabi, kijeni ebe...irai ijo Ekesisianakinan loibunit kama ejai Edeke:...naarai emamei itunganan yenedepori aswam aanyuneta nu nuiswamai ijo, dimikito ejai Edeke kanges.

Kobongok Yesu kotema nges atiar,...abeit, abeit katemari ijo atiar, arai mam itunganan eurio nakiareit,...

...abeit katemari ijo atiar, arai mam itunganan eurio nakiareit, mam epedori aanyun ajakanut naka Edeke.

79 eipone bo ali kilomara ijo toma? Kiurikinio ijo tomake. Eyatakisi aisiom aingiset.

Kobala Nikodemo Nges ebe, ikwaikini ai itunganan eurio kemojong?...

Itei jo ngun, akuan, ekesisianakinan, etunganan loapolon, esasedoti, loepol okar, esiomit Ebaibuli aijarake kere.

...epedori kereka airucakin alomar akoik naka atotoke, kouriai?

Kwana, mam ngin eputosi kede ice kotoma ikesisianakinak luipupi ijo lolo?

Kobongok Yesu ebe,...abeit, abeit, katemari jo atiar, arai mam itunganan eurio kakipi ka...Emoyo, mam epedori alomun ajakanut naka Edeke.

80 "Tetere kinyeik ngesi aimorikikin tomake"? Mam ijo ipedori aimorikikin tomake. Mam "Obia ido kolom." Obua ido kourun!

Ibore yeneuriei akuan erai akuan; ka yeneuriei Emoyo erai Emoyo,

Sirikiwumok naarai kabala jo ebe, ibusakinit yes aurio nakiareit.

Ekusi ekwam mama ekot, ipupi airurumake; konye mam ipedori aijen kama kebunio, karaida mama ebei; ikoni nen nginitunganan yeneuriei Emoyo.

Itei jo, mam jo ilomari tomaKe alomar, erai ibore yen aiyeyea. Iurikino jo toma Akuan naka ayeiyea naka naka Kristo. Eipone ngol ijaunor jo tomaKe.

81 Ikorinton lusodit, esula lo 12. Ekunyakisi ber ngaren mot. Eroko ideuna idis. Ekoto eong aitam angetakin karai apedori eong. Arai ti jo...ajei eong ebe emwana, konye kageutu kane, ipak edit, Ikorinton lusodit, esula lo 12, ekokoro lo 13.

"Kotoma ayogan naakan, kotoma aitutuk adiopet. Etutuk eong aiyuun ekanisa loapolon lo Iromayon. Bia oting akakan ayogan. Ibwaikekonikiror koitaabo. Kotoma obalua ediopet, bia kotoma abalua ediopet"? Aticepak isiomuni ngun kotoma koitaabon luka Amucalan luenyaritai Birthday Almanac, konye mam jo isiomuni kotoma Obaibuli loka Edeke. Eebo, ipa. Eebo.

Naarai kaponi kibatisai oni kotoma Emoyo ediopet (aimorikikin, aiwadikaikin ekiror?) araun (erionget ediopet?) akuan adiopet, naerai akuan naka Kristo, karaida iyudayan, karaida iyonanin, karaida ibulesin, kaeaida luijakakaete; aponi kere...oni kere kitamasi Emoyo ediopet.

Mam erai emoyo loka Methodist, emoyo loka Baptist, emoyo loka pentekosit. Konye, "Kotoma Emoyo ediopet Lokalaunan aponi oni kere kibatisaikin toma Okicoi lo loileleba aokot."

Eokunitai kotoma amirii nuka Immanuel,

Neapono kilumokinai ikadiakanarak toma aidules naka akalele,

Kanu alacar amasinikineta kere nuka adiakarikec.

Abu ekokolan loajai atwanare kiyalamikin aanyun

Ekicoi ngol kotoma apakike;

Epuda eongoda ajaun ngina, karaida adiakarit kwape kangesi,

Kilota akadiakanareta awai.

82 Akuan adiopet, eipone ali abunio akuan ngin? Eipone lokilomaria tomake? "Kotoma Emoyo ediopet aponi kibatisai oni kere toma Akuan adiopet." Ido neijaar Akuanangin, ilajaara, ojena ejok cut ebe ejai

ajarun, "Abu Edeke ibwaik mamaKe adiakariwok kere." Mam erai kotoma "aiyogaikin kakanin," mam erai kotoma "kobalua loka ekanisa." Konye, "Kotoma Emoyo ediopet; Eyudayat, Imoit, lo dos, erionon, loakwangan, kere ebatisaikin Akuanangin kotoma Emoyo ediopet, kotoma Aokot nuka aitutuketeKe elopet." "Ido ne aanyuna Eong Aokot, atubor Eong kamaakon." Ido komamei atwanare, komamei apipil, komamei adaikar. "Ngol loeuriei Edeke mam ediaakanari, naarai esalakinit ekinyomit loka Edeke mamake ido mam epedori adiakar." Emamei adiakar.

Abala Yesu ebe, "Koraasi luitekora, kwape eraar Papakus lokotoma Akuj loitekora," eipone ali iraunor jo loitekora? Mam jo ipedori aswam ngun. Aponi kourikin jo toma adiakar, itopolounete kotoma opali, obuni akwap kinera aingal. Konye neicamunia jo Yesu kwape loebwokin akinidiakar, neicamunia ji Nges kotoma aiyuun, kiyuu jo ebe abu Ngesi kitajar jo, ido kotwana aboisikon kosodi aitajar jo, ido ebe abu kotwana kaboisikon kosodi alemar adiaakanaretakon, aso kocamuni do jo Edeke kosodi aibatisaikin jo Akuan ido mam bobo itei adiodiakar cut. Eipone ali araunor eong adiaakanaran ojai a-alucet olutari kanuka?

83 Ikwaikinete ipolisin ai ikamunete eong koibuga, kocamakinitos eong apedorosio nuke eibuga eong akerit ediosipidi loakoto eong? Mam ijo ipedori aikamun eong. Ketema Emea ebe, "Rev. Branham, ijai alosit ayuun luadekak. Oker kwa ikotor, kadioboisit kere," oinakini ngesi eong abulua naecamikinit eong aswam ngun, emamei edio polisit loepedori ayangar eong toma. Naarai amunokin Emeya eong, ebe ti mam eong eswamau ngun arai mam erai kanu engeso.

Ido neacamuna eong Edeke kosodi aibatis eong Kede Emoyo Lokalaunan, abu omunokin eong ebe mam eong abuni apeleikin adiakar. Amen. Mam eong abuni apeleikin adiakar. Kanukangun, abu Okokuke iswamau alucet kanuka, ido mam Eong apedori araun akadiaakanaran nearaar eong loetojokaritai ido ebwaiki Ngesi eong Akuanake. Alakunitai eong Kanges. Mam erai nueswamai eong, konye nuabu Ngesi Ikwamaik eong. Nges ngun Akiro nukajokak.

84 Ipeson 4:30, ebala ebe, "Sirkidakikisi Emoyo Lokalaunan loka Edeke lokipucakinere yes kiton aparau naka alakuniokus."

Abu alimonokinan loajenara loko Baptist olimok eong pac, ebe, Onac Branham, abu Aburam kiyuu Edeke, ido aponi kimarkinai nges adolit. Inyo bobo ti abeit ngesi aswam adepar aiyuun Edeke? Ebala ebe, "Iyuuni oni kadumunete Emoyo Lokalaunan nekiyuuna."

Abu eong katema ebe, "Ibirora jo. Ibirora jo kotoma abeit. Abala Paul ebe, kotoma aswamisio nuka Iyakia 19, nejaas ngul luajaas kede ecokon loajok kangina, epulida loebelokina, 'Apotu kereka yesida kodumutu Emoyo Lokalaunan egeun nekiyuuniata?'"

Ebala elimuni ebe, "Mam Ebaibuli losodit ebala kwangin."

Atemari eong ebe, "Ebala kwangin. Ajaatatar eong kede loenyaritai Emphatic Diaglott. Ido inera kwapekwangin, kotoma kangini julunet, Ayonanin kede Aburanian kere. Abala ebe, "Abu Aburam iyuu, erai ngin abeit. Konye abu Edeke oinak nges aanyunet ebe acamu Ngesi akeyuun, koipone lo ainakin nges aipucet nakepio." Erai ngin abeit. Abu kodau acamun nges, naarai abu koinak nges aanyunet abe adaunit Ngesi acamun nges.

Arai ibala ijo ebe kiyuunit, ido komam idumunit Emoyo Lokalaunan ber, mam Edeke ipucakinit ijo ber, mam ejaatatar emun nailosikina amunokin ijo ber. Ibu mama ejai Edeke, ipucakini ijo Edeke kede Emoyo Lokalaunan kiton apaaran naka Alakunio. Ngin nges Aisiraret naka Ekanisa. Amen.

85 Aikunyakin ngaren mot. Eebo. Kwana, Ikorinton Lusodit 12:13, "Kanuka Emoyo ediopet kibatisaikinitai oni kere toma Akuan adiopet."

Aswamisio nuka Ikiyakia, ejai ne eipone loilomaria oni tomake. Ne nges ejai aitegeario naka Ekanisa, Aswamisio nuka Ikiyakia, esula lo 2. Nealimonokinare Aisiraret nasodit mama ejai Ekanisa, akaulo naka Apaaran naka Pentekosit, aponi kes kere ilelebai kede Emoyo Lokalaunan. Maria, ikiyakia kere, kere aponi ilelebai kede Emoyo Lokalaunan, kineras kede angajepa, ido kinyikoknitos kwape aibunget naka-naka-naka itunga kalu emaras. Ido neajaatatar kesi toma apak ngin nationo, iluluete ido komaete Edeke, ido iriangiriangasi kokwap naka apedor naka Emoyo Lokalaunan, mam kes apodosi arai erai apaaran Nakasabiiti, Nabalaasa, apaaran naarai ngin. Ajaas kesi toma apaaran kes napolon, iluluete ido kinyikoknitos. Inyobo, abalas itunga lukacoa ebe, "Emeras itunga lu ebino lowinyiwin." "

86 Kwana, abwoi Petero kane kede ilaceta luka Akabakanut, kosiepike, ilaceta mama ejai Emoyo Lokalaunan. Abala Yesu ebe, "Abala Eong ebe, Irai ijo Petero. Kaatida na adukokini Ekakinisa, ido ikirigin da luka okatwak mam ipikorete." Inyobo ngin? Abeit Nakomoyo naepukoritai. "Mam aokot ka akuan ipokokinitos ijo Na. Mam ijo isisiaunit na kosomero loisisiare akiro nuka ediini. Mam icetunganan abu isisianak ijo na, kotaabon. Konye erai apukokinio itei jo. Apukokinio! Abala Eong ebe irai ijo Petero. Ainakini ijo ilaceta luka Akabakanut. Nuieni ijo kere kotoma akwap, abuni Eong aien kotoma Akuj. Nuilacari ijo kotoma akwap abuni Eong alacar kotoma Akuj." Ejai Nges aidar Akekirot. Kotoma apaaran naka Opentekosit, ingaibo arai ekeneran? Petero, naarai ajaatatar ngesi ilaceta.

87 Ido akenatar kesi ngul, ebalas, "Emeras itunga lu ebino lowinyiwinu."

Ebala Petero ebe, "Erai lo esawa lokiuniet loka atupuruc, mam itunga lu emeraz. Kony Nu kes nuenerit enabi Yoel, "Ebala Edeke ebe, kotoma apaarasia nukawasia, abukokini Ekamoyo mama ejaas awat. Edwarete ikusidwe lusap ka lupesur. Abukokini ekamoyo obulesin ka abulesin. Aanyunete akusitumunak aitapoeta. Irujaete ikusimakio airujasia. Ido etodikini aanyuneta kotoma Kuju kakuj ka kwap kakwap. Kosodi kanen itajaruunos kere luiwoneete ekiror loka Ejakait."

"Nakeirariata nu, kodwitasi ikecetaun, kotemas Petero ka luce ikiyakia ebe, "Ikiliok ka inacan, eswamata anyoika tetere itajaruun?" Ayakian na ne naka Ekanisa. Kwana akotosi ajenun eipone loka alomar toma Akuan na naka aiyeiyea. Eebo.

Aswamasio nuka Ikiyakia, esula lo 2, ageun okokoron 37, aitegeario naka Alimonikin. Mam ijo ipedori aijulakin ngin. Mam ijo ipedori aijulakin ngin. Kopupok.

88 Arai iwadikaik ijo emuron amukian, kosodi ijo ayangar aboisit naegwelanarere ike, nejai agwelanaran ike lomam ejeni nuswama, ijani ijo, epedori aiyar ijo kede aiwadikaet kangin. Itei ijo, iwadikai emuron cut kere, naarai itutuoritai nges aswam ngun. Ido iwadikai ngesi epoison loepol, kosodi aibwaikin icebore toma nen yenitilimimi epoison ngol loepol. Ejai nges abwaikin icebore yenitilimimi ekia loce je. Ido arai mam amukian ngin etupio cut kwape kiwadikator emuron, epedori aiyar ijo.

89 Ido, ebe, Edeke nges Emuron. Erai Ngesi Emuron loka etau. Erai Ngesi Emuron loka aitajario. Ido abu Ngesi isisianak etunganan kotoma acoake Elopel, Petero, etunganan lomam esisiat lomam apedori karaida aisiomun ekekiror iwadikaikin ngareneke. Konye abu Ngesi koinak ngol Emoyo Lokalaunan, kosodi ainakin nges ekalaamu kanu aiwadik Aisisianakin. Aso, apaaran naka Opentekosit, abu kiwadik amukian. Annyutu nuabu ngesi iwadik. Emuron Petero, aanyutu ber nuinera aiwadikaetekon kanuikamunitos aitajario. Aanyutu nuaponi kiwadikai.

Nakiirariata ngun koditasi ikecetaun, kobolas Petero ka...ikiyakia ice ebe, ikiliok ka inacan, kekonakis ai?

(Kocoite, ijaatatar ijo ilaceta.) Koosodi kotema Petero atiar, kitoronokinos, kibatisaunos, ngitunganan kayesi, kokiror loka Yesu Kristo, kanuka aisionio naka aibucanaretakus; kiinakinio ainakineta naka Emoyo Lokalaunan.

Naarai aisumunet erai kanukus, ka ikusidwe da,...ka itunga kere luelwaka kere luenyarauni Ejakait Edekewok mamakeng.

90 Ngin nges amukian. Mam bobo ijo da ijulakini; iyari ijo ikadekanikon. Nges ationis kede itunga lu luipu luineras na ebe, "Papa, Okoku, Emoyo Lokalaunan." ejaas aiyar itunga luipu luka Omoyo, imukietai kede ibore yenaronon. Emamei ibore kwa kangin. Emamei itunganan yenibatisatere, kokiror loka "Papa, Okoku, Emoyo, Lokalaunan," kotoma Obaibuli. Mam cut kelimunitere ibore kwa kangin kiton Ekanisa loka Atulik. Ekanisa loka Atulik nges totoke kangun. Kongic nuiwadikaere. Kongic akiro nukolosek kosodi aanyun. Anapetait nasodit naponi kiswamai kotoma "Papa. Okoku, Emoyo," arai esasedoti loka Atulik.

Apotu kicokicokata kes. Acokicok arai Ekanisa loka Atulik etegeari, "TOTO NAKA NUDOTE." Kobuni kau cut kwap kiton "amalaayat."

Abala kotoma atikasimu ebe, "Ejai tope ibore yenebakai ebe egereesat aitajaruun?" Ebala, "Ejena, acepakio, naarai ecamunito kesi a-aisisianakin naka Atulik." Mam ecamunete ayangar nuebala Ekecebaibuli. Ibatisaete kokiror loka Papa, Okoku, ka Emoyo Lokalaunan," Ido emameitor ekokoro kanukangun. Ebala, "Konye ekanisa loka Atulik nges ageuni ngun," Ido ecamunitos kesi ngun ebe. "Kotoma ainapeta nuka Atulik, epedorio ice aitajar." Emamei ibore kwa kangin. Amamei itunganan yenibatisatere koipone kangol. Emamei yenicokicokitere, kotoma Obaibuli, abukokin, arai koiponece dimarai aitulum toma akipi, kokiror loka Yesu Kristo, kanuka asionio naka adikanareta.

91 Nyobo apotu oni asiomata apak edit kau, ido abu eong alimok yes, ebe, ibongori oni tomake ekaulo? Ebe, "Aitoronokin ka aisionio naka adiakar ekoto olimonokinai Kokirorike." Kiton bo ai? Yerusalem bon, Oyudayan? "Atekerin kere, akwap kere, ageun koYerusalem." Kwana, abu, Emuron Simon Petero kiwadik amukian.

Dobodo yesi, ikemukiak, ijo itamit aibwaiki icebore tomake? Mam iyatakini idiobore tomake. Oyanga kwape kejaar. Ngin nges ayakian naka Ekanisa. Eipone ngol nges ilomaria ijo tomake, "Atononikin, ido ibatisai kokiror loka Yesu Kristo kanuka aisionio naka adikanareta, ka aisumunet ebe ibuni ijo adumun Emoyo Lokalaunan." Kwana, ngun kes abala Ebaibuli, "Aibatisaikinio toma Okanisa! Aibatisaikinio toma Okanisa!"

92 Asiomata ber Igalatian 3:26, ipak edit. Kideikina oni adiopel, aarei bon, iboro iuni bobo kane, kasodete do oni agolokin. Kwana kasiomata kanejaas Igalatian, esula lo 3. Arai edumu icetunganan oroko

eong edumuna, kosiom. [Ogeuni inac aisiom Igalatian 3:26, "Naarai iras kere odwe..."-Ekewa.] Kolot ngaren ["Naarai iras kere odwe luka Edeke kanuka aiyuun kotoma Kristo Yesu."] Igalatian 3:26? [Kosiom.]

Aticepak apedori eong asiomite, ewadikate ngin erono kane, sek. Epedori korai Ikolosain. Asiomata ber oni Ikolosain. Ajeni eong-ajeni eong neajai eong aitenar. Aanyutu ber oni arai erai Ikolosain 3:26. Mam. Emamei 3:26.

Inyobodo kwana, Igalatian 3:26? [Kotemar inac ebe, "Eebo."-Ekewa.] Ne, adum eong kane. Ejok. Kosiom, inac, Igalatian 3:26, kwape eraar ijo nges abu kogeu. Nges ne, 26, 27 ka 28. Kwana opupok ejok. [Kosiomi inac Igalatian 3:26-28.]

[Naarai iras kere odwe luka Edeke kanuka aiyuun kotoma Kristo Yesu.]

[Naarai yes kere lukibatisatai kotoma Kristo, inapata Kristo.]

[Emamei Eyudayat karaida Eyonanit, emamei ebulesit karaida loijakaai, emamei ekiliokit karaida naberu, naarai iras yesi kere idiopet kotoma Kristo Yesu.]

Eipone bo ali kilomaria ijo toma Akuan na? Eipone bo ali kiswama oni ngin? "Kibatisaikinitai kede Emoyo Lokalaunan, toma Akuan naka Kristo Yesu."

93 Kwana, icebore yenerai Aisiraret naka Ekanisa nges, eipone lokilomara oni toma Okanisa, erai kototma aitalaunio. Ido aitalaunio, Iburanian 13:12 ka 13 "Kanuka ngun Yesu da, abu korieba kokinga kerute, tetere italauni itunga kaokotoke elopet."

Kwana, Ipeson, kalototo ne. Ebeit oni aisiom ngin. Ipeson 5:25, katipet noi kwana. Ipeson 5:25. Eebo. Ngesi ne, 5:25. Mam, eroko eong edumuna. Mam eong ewadikat kane ejok. Aanyutu. "Kanuka ngun ikalimonokinak ka isasedotin..." Oo, eebo. Esunyit eong ewadikai nu, apak edit kau, akoto eong ebucite ngin...Oo, apukorit eong apapula naegitara. Ngesi nen. Amen. Eebo. Ejok.

Iburanian 12 ka 13, "Kanuka ngun Yesu da abu korieba kokinga kerute, tetere italauni itunga kaokotoke elopet."

94 Kanuka ngun, itunga, lo nges eipone loibunio oni Okanisa: kede aitoronokin: kibatisatete kokiror loka Yesu Kristo kanuka asionio naka adiaakanaretawok; ka aismunet ebe ibuni oni adumun aibatisao naka Emoyo Lokalaunan. Kanuka ngun, emamei ekalimonokinan loepedori aijangakin oni kiton alomar tomake. Emamei esasedoti loepedori ailairaiakin oni tomake. Konye kiurikinio kiton tomake, kede Ekabaka loka Akabakanut naka Mesia. Amen.

Kwana, napena bon, eong apedori adumun adiopet napena? Arai ne nges ajai. Imwasi bo ai luepote atitingikin kede eong idakikan idis bobo? [Kotemari atukos ebe, "Amen."-Ekewa.] Itei jo? Bon e...Erai isawan iuni kede atutubet, ido atubor esawa.

95 Kwana, oni ipedori Alomar Kuju komamei Ekanisa? Alemutu ber oni akiro adis nuineritos itunga nuikamunitos nu. Ajaatatar nuiwadikatai ne, kwape kisesenia ijo. Konye eong-eong adiopet ibore bon, tetere oni ijenuni. Mam, ipa. Mam ijo kipedori alosit Kuju komam iraunit emeeba loka Ekanisa kalo.

Kwana, ibore yenisodit, kotoma Yokana 3:5, Abala Yesu ebe, "Arai mam etunganan eurio kakipi, ka Emoyo! (Kitoronokinos, ido kibatisaunos, kokiror loka Yesu Kristo kanuka aisionio naka adiaakanareta, ido iurunio do yes ka Emoyo.)" Aurunio kakipi, aurunio ka Emoyo! "Arai mam itunganan adumuni Na, mam nges epedori karaida alomar Akabakanut naka Akuj." Mam epedori aanyun Akabakanur naka Akuj. Aso arai kiuruun ijo kede akipi ka Emoyo, ijai do ijo Okanisa. Arai mam ijo iurunilai kakipi ka Emoyo, mam ijo ijai Okanisa, ido mam ijo ipedori aanyun Akabakanut naka Akuj. Ngin ejai aijen toma? [Kotemari atukos ebe, "Amen."-Ekewa.] Edolit ngin cut bec. Kwana, ijeni lem ijo...

96 Ibala ijo ebe, "Eebo, Onac Branham, eyuunit eong," eebo, kopupok, "ido mam eong adumunitor Emoyo Lokalaunan." Mam, eroko ijo iyuuna ber. Iyuunit ber kiton aiyuun. Ejai ijo amun.

Naarai, kotoma kanejaas Ikorinton Lusodit, esula lo 12, ka ekokoro lo 3. Agwareputu ber oni ngin atipete atipet ajaas do ayapikin ngin, arai ikoto ijo. Ikorinton Lusodit 12, esula lo 12 ekokoro lo 3. Kadumutu ngun katipet, kasodete-kasodete aisiom nu kane, kasodete aanyun nuejaatatar Edeke kanuwok kotoma Kana. Ikorinton lusodit, eebo, kotoma okokoro lo 3.

Kanuka ngun kitejenuni yes ebe, emamei itunganan yenera kOmoyo loka Edeke ebe ikeboi Yesu: kwabo...mam epedori itunganan atemar ebe...Yesu Nges Ejakait, dimarai kOmoyo Lokalaunan.

97 Emameete nuijeni ijo nuikamunitos ngun kiton neidumuna ijo Emoyo Lokalaunan. Ibala ijo be, "Acamunit eong Yesu Kristo kwape Eketajaranika." Kidumunit Emoyo Lokalaunan ageun nakiyuunita? Arai

mam, mam ijo ipedori karaida anyara Nges ebe Ejakait, naarai mam Nges erai Ejakait. Erai do Ngesi etunganan lokolosek loicam ijo, kanuka aiyuun. Konye elomu Ngesi tomakon, kanuka Emoyo Lokalaunan, eraun Ngesi Ejakaitikon. Emamei etunganan loipedori anyara Yesu, "Ejakait," bon kanuka Emoyo Lokaunan; kiton nekiurunere ijo ka Emoyo Loka Edeke, kosodi Emoyo Lokalaunan ajaun tomakon. Aso, arai do, iurun ijo toma Akabakanut na, irai do ijo atutubet naka Ekanisa. Iraas do yesi luenyaraunitai kinga. Itei jo? [Kotemari atukos ebe, "Amen."-Ekewa.] Ejok, do kwana.

98 Epedori kereka aijar alomun kanejai akimait, arai emameototor ekinyomit ngol aijar kotomake? Arai iraikin ekinyomit loakimait kwap, ediopet loejari, kosodi loceje emamei aijar kotoma, epedori kereka ajarun bobo? [Kotemari atukos ebe, "Mam."-Ekewa.] Mam nepecepeda. Emamei ibore kotomake. Karaida epedori aitolomun akiria nuejokuka kwape kanuitolomuni je loejari. Iswamauni da emugati loejok kwape kalo iswamauni je. Ebuni atakan abubuketeke erai loejok kwape kaloce kaje. Konye arai emameotor aijar kotomake, mam epedori ajarun bobo.

99 Itunganan yenerai yenajokan, epedori araut itunganan yenajokan okanisa kwape Ikristayot. Itunganan yenajokan, epedori araut itunganan yenajokan kwape Ikristayot; etunganan loejok, etunganan loejokuka ipenesio. Konye etwana ngesi, odaun, arai mam nges euritai nakiareit ka Emoyo Loka Edeke. Naarai, nginibore yenejaatatar ageunet ajaatatar esange.

Edeke bon nges ibore yenimam Edaun. Kanuka ngun, irai oni atutubet naka Edeke, koipone kalo aijaun aijaraKe. Abala Yesu ebe, "Ainakini kes aijar namam edaun." Akirot naka Ayonanin kanen erai Zoe, akepolou "Aijar Obe naka Edeke." Ido eipone ediopet bon loipedoria ijo aijar bobo nges ajaut kede aijar naka ikar kere, naerai aijar naka Edeke. Naarai emudiar akonijar. Konye itajarunio bobo akeijar, naarai Edeke lomam edaun. Ido idum ijo aijar namam edaun, ido ipedori...mam bobo ipedori atwanare kwape mam Edeke etwania. "Ngin yeniyuuni Eong ejaas ka aijar namam edaun, ido etonyouni Eong nges kapaaran nawasia, aitajarun nges bobo." Aijar nanam edaun naejai tomake ebuni aitajarun nges.

100 Kwana, ipedori oni alosit kuju komam ijauna okanisa? Mam ijo ipedori ajaun Okanisa kiton nikiurunere ijo nakiareit. Mam ijo ipedori alosit Kujun kiton nekiurunere ijo nakiareit. Arai kiurun ijo nakiareit, ijai do ijo Okanisa. Aso mam ijo ipedori alosit toma Akuj kiton neiraunor ijo emeeba loka Okanisa, ido mam ijo ipedori araun emeeba kiton nekiurikinere ijo tomake.

Ido kwana, eong ber eputa ijo mot. Ido mam ijo ipedori araun emeeba arai mam Edeke inyaraunit ijo araun emeeba. Kwana, eipone bodo ali ebeitor ijo aiyalama kanuka ngun, naarai aponi kosekikin ijo sek eroko apetetai naka akwap. Ido ekonikiror...wau!"Ewadikatai ikusikiroria toma Oitaabo loka aijar loka Imerekek," eitaabo loka Ekanisa, "Eroko apetetai naka akwap." Ebaibuli ngol.

Abala Ebaibuli ebe, "Lokasurup loka Kristo," iriongeta, ekanisa loka Atulik ka iceriongeta, "ingalaarete iriongeta kere luejaas akwap lumam ewadikatai ikecekororia toma Oitaabo loka aijar loka Imerekek eroko apetetai naka akwap."

Abala Yesu ebe, "Kere lu ainak Eong Papa epote mamaKa." Akekirot ngin Obe. Mere nuiswamat ijo, konye nuiswamat Ngesi.

101 Etemokisi ber oni ngin, ipak edit. Apukosi Ipeson, esula 1, katipet. Kopupok na. Paul lo. Kwana, ajai nges alosit kiton aitekooro kede Ekanisa. Ejai Paul ainer kede Ikristayon lu. Imwasi bo ai Ikristayon ejaas toma ne? Aanyutu akusikanin [Kotemari atukos ebe, "Amen."-Ekewa.] Eebo. Mam na erai kanuka imukerun, kwana. Erai na-erai na kanuka ngul luepedorete ainyam akiring. Kwana, esula 1, kosesen itunga luejai ngesi ainerakin.

Paul ekiyakia loka Kristo Yesu kanuka akot naka... (mere kanuka ainyonyoikini naka ekaanyanaran, mere kanuka erionget)

...ekiyakia (nges ngol loiyakiaritai) kanuka akot naka Edeke mama ejaas lukalaunak (ngul kes luitalaunitai, arai lukalaunak) luejaas Epeso, ka...luiyuuni

Ingaibo ejai ngesi alimokin akiro ngun? Mama ejaas ngul luejaas sek Okanisa. Nekijaar ijo toma Kristo, ijai ijo toma Akuanake. Ngun eraas abeit? [Kotemari atukos ebe, "Amen."-Ekewa.] Aso iraas do imeeban luka Okanisa lukotoma Kristo Yesu:

102 *Kojai asianut mama ijaas ka ainapakin nuepote kama ejai Edeke Papawok,...ka...Ejakait Yesu Kristo.*

Kituritete Edeke Papa da loka Ejakaitiwok Yesu Kristo, lokisirerengit oni ka arereng kere naka Emoyo kotoma Kristo toma aiboisio nuka Akuj kotoma Kristo Yesu:

Eipone bo ali abu Nges kismama? Inyobo abu Ngesi iswama? Adaunitos kesi adolore Yordan. Apotu kotuboros kiton akwap naka aisumunet, ido eboiete kotoma aiboisio nukotoma Akuj kotoma Kristo Yesu. Nges ngin kanen. "Abu kisirereng oni nepepe kede arerengusio nukotoma Akuj," aisisianakin naka Akirot,

kwape Ekanisa, luenyaraunitai kinga kotoma Kristo Yesu. "Kwape kiboio nepepe kotoma aibosio nukototma Akuj," kwape Kekanisa, kiuruun oni kotoma Kristo Yesu. "Lukalaunak, luenyaraunitai kinga," oo, ikatunga, icetunganan yenepedori Ngesi asisianakin icebore. Ajaas kede ationis naapol kede Ikorinton, konye mere Ekanisa lo. Apedori ngesi aisianakin kes, iboro lukapolok. Eebo.

103 *Kituritete Edeke, Papa da loka Ejakaitiwok Yesu Kristo, lokisirerengit oni karereng kere...*

Kiitunit ijo Akaisiranareta aarei nuka okau?

Karereng kere naka emoyo kotoma Kristo:

Kwape abu...

Kopupok kisirieng na ijo kwana.

Kwape abu (nuka Okau) koseunia oni kotomakeng...

"Kotoma aisikwaruunio natubor? Eong abu kasiom ngin ejok? [Kotemari atukos ebe "Mam."-Ekewa.]

Kwape abu koseunia oni kotomakeng eringa epesikina apetetait naka Kwap, eringa akwap,... (Kosesen ne.)...eringa epesikina apetetait naka akwap, tetere kirauni oni lukalaunak, luemamei aitoronet da, kakonyeneke kotoma amin:

Abu K-i-n-e-r-u-s-e-k...

104 Inyobo apotu oni keswamaata? Emamei ibore. Nuabu Ngesi kiswama kes aseseni eong. Iwori bo abu Ngesi kiswama ngun? Abu koseu oni, kibwaik iwokokiroria Oitaabo, Oitaabo loka Okanisake, araun emeeba loka Akuan kana nakaiyeiyea, eringa akwap egeunia.

Abu kineru sek oni araut idwe mamakeng kanuka Yesu Kristo, kwape itojokitor akoteke,

Wau! Ekoto oni ajaun toma Okanisa ngol, onac, arai ipedo ijo, naarai ebunit Ngesi aomun Ekanisa. Eipone ekanisa bo ali? "Ekanisa loemamei aitoronet, arai loemamei asukokinet." Eipone ali ipedoria oni araun ngol? Koipone kalo atwanare kotoma Kristo, kibatisaikin kede Emoyo Lokalaunan toma Akuan naka aiyeiyea, ka alucet naka aokot nuka Okoku loka Edeke eperete kangina kanuwok kangolisawa loka apaaran. "Kodumun emamei aitoronet," ngol nges Ekanisa, "Loemamei aitoronet, arai loemamei asukokinet." Abu Ngesi koseu oni kotomake, kosodi aibwaikin iwokokiroria toma Oitaabo.

Abala Ebaibuli, ebe, "Arai Yesu Kristo Imerekek yenaaritai..." Ikar akwatakanykaongon kau? Aojau naitia ai? Imerekek yenaaritai ageun apetai naka akwap."

105 Iworibo, "Edeke," kotoma Obaibuli, Akirot kotoma Ageun, Ageun 1 ebal, "Kageunet abu Edeke..." Kolem ekiror ngol Edeke kotoma Aburarian, kosodi aanyun akepolou. Iwadikatai ebe El, Elah, Elohim, loerai akepolou "Loejai kanukeng bon, loileleba, loegogong." Amamei idiobore eroko Ngol ejaunia. Amamei ekwam. Amameete aicer. Amamei apalal. Amamei-amamei apak, amameete iboro ludidik noi luenyaritai Atoms. Amameete iboro ludidik luanyaritai Molecules. Amamei idiobore eroko Ngol ejauna. Arai Edeke, lomam edaun. Ido tomake ajaas aomisio, araut eketajaran, araut Papa, araut Edeke. Kangina, mam Nges arai Edeke, ber. Arai Ngesi-arai Ngesi Edeke, konye amamei bobo icebore, amamei aima. Aso, erai Edeke "ibore yenemaio," ido amamei ibore yenabeit aima Nges. Aso ajai einono tomake araut ngun, araut eketajaran, araut eketangalan, araut iboro lu kere luerai Ngesi.

106 Aso ibore yenisodit Nges aiswamaun. Kwana, ice kotoma kayesi ikotosi ajenun akakiro nuka Ageun. Abala Edeke ebe, "Asubutu etunganan." Ibore yenisodit yenabu Ngesi kosub, nges Imalaikan, kanu aima Nges, aso koraun do Ngesi Edeke. Dodo neatemara Ngesi ebe, "Asubutu etunganan kotoma asimawok," etunganan loepone ali abu Ngesi kosub? Etunganan lokOmoyo. Kosodi, esubu Ngesi etunganan ngol, abu koinak Nges eyaitene. Kosubuni do Ngesi etunganan kotoma apua naka akwap. Anen, ibiror etunganan, koraun do Ngesi Etajaran. Edeke, kosodi do Etajaran. Oyauni adiakar adek, oraun do Ngesi Ekatangean. Aleluia! Emamei ibore yenibucara. Ajeni Ngesi ngun kere eroko akwap esubuna. Ajeni da ebe ijaun oni kede airiamun atibong na. Ajeni Ngesi ebe epote imukunyo ludidik ajaun akwap, eipone loebeitor kesi apolo, irwan imwasi ai ebeitor kes airwakanakin akecekonye. Erai Ngesi Edeke loemamei esange. Ejeni iboro kere. Amen. Mam kereke yes iyalamasi, atibong na, ebe ejai ekonikiror Oitaabo? [Otemari atukos ebe, "Amen."-Ekewa.]

Ibus bo lolo aomisioit naomomoi eong
Naikamunit ikweny yenengwaringwari,
Ido abalas kesi ebe iwadikatai ikekiror
Toma apapulai nuka Akirot Nakalaunan naka Edeke.
Ikweny luce kere eporete irimirimete nges,
Emwangitos nges luce kere.

107 Inyobo arai ikweny yenangwaringwari? Mam eong acamanara kede ekesa loabala ebe ibucara ngin.

Inyobo arai ikweny yenangwaringwari yenikObaibuli? Mam arai Isirael, kwape kabalatar kesi ebe arai. Arai Ekanisa loka Yesu Kristo.

Kanuka ainakinet naka adiakar, inyobo apotu kesi iswamata? Apotu kolemutu ijabat, kongedas awai akau naka idiopet kosodete aitulur kwap, kosodete abukokin aokot nejai ipaupake yenajari, kosodete alacakin ipaupake. Ido kobwasitete ipaup, kede aokot nuka ipaupake yenatwan, kolot arimor akwap, ebwasitai kwape kaporia kakebebenoka. Ido isiarakinos aokot toma akwap, komony, "Lokalaunan, lokalaunan, lokalaunan, mama ejai Ejakait! Lokaunan, lokalaunan, lokalaunan, mama ejai Ejakait!"

108 Arai aitupuset naka Kristo. Ido ikweny yenapolon yenangwaringwari nges Ekanisa loabwasi kede aokot nuka Oupake loatwan, Etajaran, Yesu Kristo. Ido ejai kitorit akwap lolo, kibwakibwaki abebenokake, komonyi, "Lokalaunan, lokalaunan, lokalaunan, mama ejai Ejakait!" Amen! Eyalama eong noi ebe ajeni eong Ngin. Eyalama eong noi ebe ejai ekakiror toma Oitaabo kaNgin, ibwaikinitai ngina mere kanuka ajokisika. Konye kanuka ajokis ka aitim naka Edeke, eringa akwap epesikina, abu kibwaik iwokokiroria Oitaabo.

109 Inyobo aitodiaret naka Ekanisa? Inyobo ebeit Nges araut? Inyobo arai Ngin? Inyobo ngin? Atukos naenyaraunitai kinga.

Ingaibo apesikini? Yesu Kristo. Mere ekaanyanaran, mere ekanisa loka Atulik, mere Methodist, Mere Luther, mere Wesley. Mam, ipa. Ingaibo apesikin? Yesu Kristo.

Inyobo Aisiraret? Aitoronokin, aibatisao naka akipi, abatisao naka Emoyo Lokalaunan, Atangal naka Edeke, Atajario.

Eipone bo ali kiraunor oni emeeba kotomake? Koipone loka aurunio tomake.

Oni kipedori alosit Kuju komamei ngin? Mam, ipa. "Naarai ngul luetwakito kotoma Kristo Yesu kes abuni Edeke ayangaun kaNges," ido mere-mere idiotunganan kere konye ngul luetwakitos kotoma Kristo. Ebunit Yesu aomun ngul luetwakitos kotoma Kristo. Ipeson esula, 4, abala ebe e...Mam Igalatian, eyuunit eong ebe erai, esula lo 4. Abala ebe, "Ngul luetwakitos kotoma Kristo kes ebuni Edeke ayangaun kaNges. Ngul luetwakitos kotoma Kristo Yesu kes ebuni Edeke ayangaun kaNges."

110 Kwana, kanuka ngun, erai nges atukos naenyaraunitai kinga, Akuan naka aiyeiyea. Kristo ebwaikini toma ainapeta. Eroko Nges etwana, abu kiner nuikamunitos ngin abunore, Abala ebe, "Abeit abunore araun Ekabaka kotoma Apugan kana. Apak edit mam akwapin aanyunete Eong konye yes ianyunete Eong. Emameuni ibore yenikamunit yesi kede akabakanut naka akwap."

Ngin nges apolou naejaatatar kesi toma aitolitoluna naikoni nen, naenyaritari Babulon." Ediopet, "Eebo, kituritete Edeke, arai eong lo Presbyterian. Kituritete Edeke arai eong lo Methodist, ituritete Edeke arai eong..."

Kituritete Edeke, arai eong Ekristayot. Amen. Nges nen. Eipone ali ajenuna eong ebe arai eong? "Etupanakinet aanyuneta nu ngul luiyuunet." Itei jo? Nen nges ejai atikitikon nakajenunio. Mere atemar ebe, "Idarek ber apak edit, eyuunit ajaatatr eong akaadika naka atukonokin." Mam. Amameotor eong adio. Ejai naka kuju Ngina. Apedori eong aitolior na naka akwap kane. Konye abu Ngesi kalimok eong, "Eringa akwap egeuna," Abu Ngesi ainak eong ekakaadi naka ajenunio, nejai nginidiopet yenabu toma Akabakanut. Ingadatai Kokuju, aso etenitos awadikaeta. Eyalama eong noi. E...

111 Abu icetunganan kotema ebe, "Abu eong amo Edeke. Aimo Edeke." Ilokonyikina ngin kede Ebaibuli. Erai Edeke imoot ijo, mere ijo imoot Edeke. Abu Edeke irim kuju-ka-kwap koManikor loka Eden, komonyi, Adam, aibo ijai ijo?" Mere Adam amonyi, Edeke aibo ijai Ijo?"Arai Edeke amonyi, "Adam, aibo ijai ijo?"

Oo, eyalama eong noi arai eong emeeba loka kangin. Ijo mam irai [Kotemari atukos ebe, "Amen."-Ekewa.] Eyalama eong noi kanuka Ekanisa loapolon. Elipit eong atimio kanu aisiyap yes adaun aojau. Konye iyuunit ijo toma Okanisa lo lokapolon? ["Amen."] Ijo iyuunit tomake? ["Amen."] Ijo iyunit ebe erai Akuan naka aiyeiyea? ["Amen."]

Kwana yesi itungan luka Atulik, ibore idiopet bon yenebeit ijo aswam kanu araun emeeba loka ngin nges acamun Yesu Kristo kosodi auruunio ka Emoyo. Yesi luko Baptist, yesi luka Methodist, Presbyterian, Lutheran, nuirai ijo kere, kopupok ne. Mam ibala ebe ayuarit eong luka Opentekosit luepalikisi kwape kediokanisa kere. Erai ngin cut bec nabeit. Epote toma kanuka ekiror bon ka alimonor. Odaun. Konye, airumet, emameototor ngin. Abeit ngin. Naarai, kiuruun ijo ka Emoyo, iraun ijo isubat yenitetet, ido egeuni Edeke aiswamanar kede ijo do kwape okoku, ido ingarenikinit do ijo Emoyo loka Edeke. Mamace erionget loijai ijo toma, mam ngol erai...Erai bon ngol inapetai yenididi yenimojong yenakwap, ebuni atubor. Konye ijo irai emeeba loka Akuan kangin nakapolon naka aiyeiyea naka Kristo? [Kotemari atukos ebe, "Amen."-Ekewa.] Arai mam, odun Nges, atibong na, kwape kituluro akwesiwok ipak edit kanuka ailip.

112 Kwape kiomooma kwana, aticepak ojaas ice ne luepedorete akeun akecekanin? Kosodete atemar:

"Edeke, ekeuni eong akakan mamakon, itaraunai eong emeeba loka Ekanisa kangol atibong na. Oinakinai eong aurio, ebe erai naka. Ijo inyaraunit eong Ejakait? Akoto do eong araun emeeba loka Okanisa kangol. Ajai eong mama ejai ediopet kotoma oriongeta luka akwap kana, konye amameotor eong ejautene ngol. Amameotor eong ka apedor airenganar ajokin ka aswam iboro lu kwape kibalar ijo ebe epote atupakin ekeyuunan. Eringa ber eong ijaunia ngun, Ejakait. Ido ilimunit Ijo ebe etupanakinete aanyuneta...(epote akepolou ebe, ibuni Ijo." Koinakinai eong apedor, Ejakait."

113 Kisirereng Edeke ijo. Kisirereng Edeke ijo, ka ijo, ka ijo kere yes luikeunitos akusikanin, kisirereng Edeke yes ido koinak yes apedor naka araut emeeba loka Ekanisa kalo, Ekanisa loka Yesu Kristo. Icetunganan, eroko oni kilipa? Kisirereng Edeke ijo, apese. Kisirereng Edeke, inac. Kisirereng Edeke ijo. Eebo, aseseni eong akusikanin kokau cut kangina. Kisirereng Edeke yesi, kwana ne; aseseni eong akan, okoku. Aseseni akusikanin kane, onac. Eebo, kisirereng ijo; ka ijo, yenididi ngin, ipese yenididi. Kisirereng Edeke ijo, icetunganan, ikeu akonikan aikeun bon. Kisirereng Edeke inac na, iboie kane. Akoto eong araun emeeba. Akoto eong ajaun kede akeokot komamaka kwape kalomara eong kinga kotoma aduketait kana atibong na, tetere eong alomari kinga ido komonyi akaijar, 'Lokalaunan, mama ejai Ejakait.'" Kisirereng Edeke ijo kokau kangina, okoku. Koinak Edeke arereng mamakon. Icetunganan kwana? Ikeu akonikan. Kolim icetunganan ebe "Edeke, kitimoi eong"?

Arai ikoto ijo abunore ngaren kolutaari kanuka ailipakinio, kwape kiwoio ekosio lo:
Obia ore, obia ore,
Yesi luipas opotu ore;

Arai mam ijo imisiikinit ekonijautene, esukunyunit eong ijo abunore, ailip.

Kwape kilipia:

Iworotoi Yesu motimot kaiyamakina,
Iworot ijo ka eong,
Koany kotoma aipanyia idareunit Ngesi ido itei,
Itei jo keong
Obia...obia ore,
Yesi luipas, opotu ore
Iwororoi Yesu, etau kere, kaiyamakina.
Enyarit, Oo, ekadiakanaran obua ore!

Awooto do kwana.

Kukinyo ebeiton oni idar...

Ogeuni Onac Branham awoere-Ekewa.]

Abu aberu adiopet napolon ngaren kanuka ailipakinio. Arai bo ijai itunganan ice yenekoto abunore ngaren kosodi ailip ipak edit atibong na?

Karaida kiswamat adiakar, ejaatatar Ngesi aitim ka aitimio,

Aitim kanukon ka kanuka.

Obia...obia ore, obia...

Arai ipedorete yesi ikesa ludidik aikunyar kwap laiye mot? Ipesur, kopotu cut toma. Ikanya ber kwap mot laiye, okoku.

...Luipas kere, opotu ore;
Kede Etau kere, kaiyapaara, iworot yesu,
Iworot, O adikanaran, obua ore!
Opotu ore, opotu ore,
Yesi luipasit, opotu ore;
Kede etau kere, kaiyapaara, iworot Yesu,
Iworot O adikanaran, obia...

Dobodo arai kojoni jo ebe, moi osawan lu, ebuni akwap ebunio aitisior akwap? Ijari oni kotoma apak na etiono noi. Mam jo ipedori amunokinidiobore, kinga naka Kristo. Ido kanukinyo ti italaikina jo, kanukinyo ti kitalaikina ijo etau ngol loabu Edeke ogwel kede aokot nuka Okooke obe? Kanukinyo mam jo ijaikina akonijar mamaKe? Inyobo iwaniari jo? Nginibore kere erai ameda.

Ibala ijo ebe, "Eebo, mam eong eyuunit nuke."

Eebo, inherit Ebaibuli ebe irai jo ebang. Kanukinyo mam jo...? Mam ekabaran abu iyuu ngin, Kobaibuli. Neajaar akolong Alomar, okiena ngesi ka alakanar; konye nealomuna akolong, ajai ogeana. Kanukinyo kiyangaara arereng kwakangin ikatuan? Kanukinyo mam jo ibunia, ainakin akonijar mama ejai Kristo? Ber eong...Mam eong ajai aikwenyar yes. Mam eong ajai aitukurian jo, ajai eong bon apesikin jo abeit. Arai mam jo eurio nakiareit, itwaniari jo. Inyobo imedau jo kotoma aijar? Esubit bala erai kere atakadikineta.

Inyo mam jo ibunia adumun ibore yenimam Edaun? Oting ibore ilopet.

Iroko iwoi bobo, ejaas iuni arai iwongon ne. inyo mam yes da iponiata, bobo?
 Kede etau kere, kaiyapaara, iworot Yesu,
 Iworot, O adiaknaran, obua ore!
 Opotu...opotu...(Erai etaukon. Mam aticepak bobo jo ibuni apupun kwaen.)
 Yes lui...-sit opotu ore; (Hei, yesi isap ludidik, inyo mam iponiata kere lailo, abunore
 kuju lailo? Ah-ha.)
 Kede etau kere, kaiya...(obia ne okoku...?...)
 ...rot Yesu, O adiaknaran, (obia cut lailo, okoku.) obua ore!
 Obia ore...(Inyo mam jo ikeunor kuju?)...ore,
 Yes luipas, obia ore (obia cut ne, okoku. Obia ne, iboikin oicolongoka...?...Iboikin
 oicolongoka...?...)
 ...-paara, iworot Yesu,
 Iworot, O adiaknaran, obua...

akoto eong aingit jo aingiset: Ijo ingetak kede Nges? ijo ilosi ainger Nges? ijo ilosi atemar, bala Pilato, "Oyautu eong akipi, elotari eong airiamun na akaninika"? Mam jo ipedori aswam ngun. Ejai akaninikon. Idon mam ejai akaninbon, ejai kiton otauwon da. Ejai toma aijenekon. Ejai ijo ajar kede nges anatar ajarakon kere. Mam itami ailotar. Ibuni ijo aiswamaun kwaka Pilato: amiedakin adiopaaran, kanu atamit alemar ngin akaninikon. Mam iswamai ngin. Obua, kwana.

Irwanace bobo. Idon nepe iroko iworoi, opotu ikiliok ice, inacan lueraas Ikristayon luajokak, yesi ijaanakinak ice kede ikiliok ice. Anacan da ace nuejenete einer kede itunga, opotu okukokinos kwap. Kilipata ked ekes, itodikisi kesi ebe ipodokinitos yesi kes, kwape ibunia kwana.

Obua ore...ore,
 (Onac Neville, arai ipedori jo, ikama do jo aijaanakin.)
 ...luipasit, opotu ore;
 Kede etau kere, kaiyapaara, Yesu...
 Iworot, O adiaknaran, obua ore!

Ketuluroto akwesiwok kwana kanuka ailip...?... ketuluroto akwesiwok kwana, kelipa.

Ejakait, iyangauni Nekon luitoronikina. Ejakait, ikam ekoni Moyo akima kotaounocek, ainakin kes eipud loidulokina, ka aca da, tetere aticepek ewanyunete Yesu, Etajaranikec, loabu koi kosodi atwanare kanukec, aitarauon kes isuban lutetiak. Oinak ngin, Ejakait.

Ijeni isio ebe einakinito nuiwadikatai isio apedor aiyuun jo. Ajenete ebe luepote lu, mam Ijo irengeari cut. Idau jo aisumun. Eraas asumunetakon nuka abeit: "Ngin yeniirari Akakiroto, kosodi aiyuun Ngol lokejukuni, ajaas ka ajar namam edaun, idon mam ebuni atubokinio; konye atubor kotoma atwanare kiton ajar."

Ludidik ka luapolok, oinak kes koipone kangopakangol, Ejakait, loka Emoyo Lokalaunan. Oinak ngin, Ejakait. Ilipi ngin, Kokiror loka Yesu, kede kanuKe.
 ...ore, opotu ore,
 Yesi luipasit...ore;
 ...Au kere, kaiyapaara, iworot Yes-...
 Iworot, O adiaknaran, obia ore!

Kwape ejaar nginitunganan kere ilipi kwana, opalasi ber mot.

[Ogeuni Onac Branham aiumuumo-Ekewa.]

Kolimosi akecediakar...



www.messagehub.info

Nuelimonokinit

William Marrion Branham

"... toma apaarasia nuka eporoto..." Apuk. 10:7